

光緒三十四年七月重刊

藤縣志

第五冊

韋文林題

MG
K296.74
11

光緒三十四年七月重刊

藤縣志

韋文林題

第五冊



3 2285 6078 9

藤縣志卷之二十

藝文志

歷朝各體

詩詞

五言古詩

紫藤樹

紫藤樹雲樹花臺宜陽春密葉隱高鳥香風留美人

唐李白

藤州江上夜起對月贈邵道士


宋蘇軾

江月照我心江水洗我肝端如徑寸珠墮此白玉盤我心本如此月滿江水湍起舞
者誰與莫作三人看嶠南瘴癘地有此江月寒乃知天壤間何人不清安牀頭有白
酒盞若白露團獨醉還獨醒夜氣清漫漫乃呼邵道士取琴月下彈相與乘一葉夜

下蒼梧灘

卷之二十 藝文志

(八百六二)



浮金亭戲作

蘇軾

昔與徐使君共賞錢塘春愛此小天竺時來中聖人松如遷客老酒似使君醇繫舟
藤城下弄月鐔江濱江月夜夜好山雲朝朝新使君有令子真是石麒麟我子乃散
材有如木困輪二老白接籬兩郎烏角巾醉臥松下石扶歸江上津浮橋半投水揭

此碧蘿纒

紫藤杖

葉原賀

托根嶺海間穿巖近清泚不知經幾年翠葉胡萎繭直榦微冰霜貞心等班玕苞鮮
紫榦新花涵清露坭已並鉄樹杖其下多甘薺采蕨者伊誰識此孤芳體携歸入紫
府柴門長夜啓舉家怪且驚千里贈老來老來忽見之傾倒笑共趣置諸文房中衣
以古錦絮賜雄人寂寂化鶴笑瀾瀾青藜空輝騰挑竹走脾睨可以備湯盤可以列
舜紙出入藉扶持異途如平砥胡然世淪亡零落任荒坻至寶出有時一朝遇愷悌
太息命奚童取向江干洗洗以文彩新光觸雙眸味厥命聖明朝舉動遵古禮慎勿

化蛟龍擬欲獻楓陛

流盃橋

曲水分山陰輿梁勝溱洧一詠見高風駟馬安足取

玉井泉

雲蒸崑山液月浸藍田英臨風咽沆瀣滿腹珠璣鳴

光華亭

霞通海天曙月來東山白共是憑欄人誰足當秋色

藤州諸勝（八景）

劍江春漲

明富禮

泊舟滄海濱天雲喜高曠化劍已成龍桃花湧春浪刻舟彼何人懷古空惆悵

石壁秋風

斷崖如削鐵開闢自太古江風西北來斑斑濕秋雨扁舟晚經過中流欲掀舞

鴨灘霜籟

秋高霜降餘灘淺石齒齒漁郎吹笛來野鷺斜飛起山頭雨石人並坐如笑指

龍巷露臺

海月照珠宮隱見蛟龍窟神人或徑行風雨助飄忽石臺晨可登秋風正蕭瑟

谷山列障

聯石如重屏彷彿郭熙畫雲橫鳥道長月照虹梁跨荒塚臥麒麟令人起悲吟

登嶼聳環

江流島嶼分亭亭聳高髻螺堆脫霧濃翠滑春雲細徘徊顧清影澄江去無際

東山夜月

東山氣鴻濛夜色白如晝月明斗牛間江動金波溜步歸松徑深清露濕衣袖

赤峽晴嵐

峽口漲晴嵐秀色渥如赭天寒山鳥啼月白林猿下仙人讀書臺石磴水湍瀉

夜泊藤縣次韻酬湛內翰

明潘希曾

泛舟蒼梧來又泊藤江口去國萬餘里通夜瞻北斗冉冉歲月逝厥柄忽露玉銀河
注清淺經緯爛星宿低頭闕無人圖書陳左右殘燈耿明滅爐烟細當牖正爾不能
寐憂來欲皓首迢迢江湖心匪爲行役久望眼不可極雲山立纏糾中道欲何依賴
茲同心友珠玉時見投繆戾亦予咎驚馬逐驂騶竭力常恐後

七言古詩

吾謫海南子由雷州被命卽行了不相知至梧乃聞尙在藤也旦夕當追及作此詩

示之

宋蘇軾

九疑聯綿屬衡湘蒼梧獨在天一方孤城吹角烟梅裡落日未落江蒼茫幽人拊枕
坐歎息我行忽至舜所藏江邊父老能說子白鬢黃頰如君長莫嫌瓊雷隔雲海聖
恩尙許遙相望平生學道眞實意豈與窮達俱存亡天其以我爲箕子要便此意留
要荒他年誰作輿地志海南萬古眞吾鄉

江月樓

秦觀

仙翁看月三百秋江波日去月不流肯因炎塵暝空濶直與江月同清幽蒼梧雲氣
眉山雨玉簫三弄無今古九天雨露蟄蛟龍琅玕長憑清虛府

九日宴浮金亭

趙崇德(知藤州)

東山樹何青青鑿津水何冷冷茂樹可蔭流水可聽眉山夫子能解事却于水邊梅
下構危亭洪波浴日金錯落瘴雲不雨煙濛溟風塵瀕洞去天遠草木鬢鬢知地靈
監州爲愛黃花節携我登臨邀衆客假令有酒多似藤江水豈能洗我胸中之鬱抑
甘侯昆玉文武全交遊傾蓋五情熱故人亦有許判官清政平生心似鐵文柔風流
喻幕賓曾陪驄馬清南粵劉君原是徽省郎治民有道多籌策令簿懷才亦不羣芳
名皆在斯文列儒林翼魏兩茂才逸氣直與青雲接孟嘉落帽是何年岸幘高風感
前詰天荒地老雨茫茫白髮無情滿簪雪醒時飲醉時歌尊前要使衰顏酡不顧奈
此清興何人生聚會能有幾湖海親舊今無多

谷山列障

元麥 徵(知藤州)

翠黛環山似城郭鳥啼春雨巖花落天晴長日捲簾看却放餘烟入簾幙

龍巷露臺

明林孔嘉(知州判)

嚴風凜冽冬正深水枯石出見峯嶽明年春浪江湖濶風雨時時聽夜吟

寶家寨

解縉

寶家寨前朝雨晴思羅江內水初生楊梅果熟春將暮豈蕊花開鳩亂鳴

金鷄驛

金鷄驛前津吏迎金鷄巖下江水聲金雞飛上九天去惟有空巖依舊名

雙競驛

雙競驛前雙小洲年年於此競龍舟翻思奪錦青天上河漢江聲共北流

劍江春漲

方子邁

東風晴雨消輕陰浪起沒沙山影沉橫纜維舟水已沒墜篙始覺江流深

藤江

李純

天光曉闢東山陰洲嶼欲沒天沉沉桃花已隨夜雨盡海鷗不知春水深失穴蛟龍
觸山怒此際神驚危砥柱柳邊舟渡浪停時行人未負斜陽暮

龍巷石

潘希曾

巉石粼粼巨江北凌風欲渡鬢鬢赤貝宮清淚濕羅衣複道西風留轍迹露肥苔蘚
盤石幽天花搖落雲不流晚涼灑掃石上月一線長繫江聲秋

拒賊行

錢溥(學士)

古藤逆行四十里白馬浦頭急如矢輓舟方渡十二磯蠻賊已屯山梅裡堦鏊鎧載
紛如雲出船仰望疑我軍高張強弩發毒矢始信賊勢來成羣柴公樓船盛旗幟賊
欲先登渾無計弼然七矢傷四人衆皆錯愕將我避賴公揮刃督其進善射復數陳
勇士徘徊且却向中流脫此虎口良不易是時官軍滿哨船遠視勝負不敢前頭哨
聞風已赴水後哨看賊登山巔賊初凌晨劫村落滿載回船意殊樂忽遇帆檣蔽岸

來竟尋生路將船泊我軍有一統率者剿絕其後解諸縛忍使婦女并幼男盼盼青
天去從惡計不出此心浩然賊反小視來侵虐親身目親尙如此道路傳聞誰復許
寄去征夷大總兵將士勇怯當先取

過霍榮合葬雙親墓

林寬(副使)

藤州存子霍時秀種萱奉母天垂佑與弟怡怡母益歡登堂共舞斑爛袖萱堂一夜
萎寒霜哭聲直徹上穹蒼談書未占升斗祿恨與臯魚何時忘牛眠佳兆神呵護奉
父遺囑同安厝忍把雙親棄原野剪棘誅茅覆廬墓雖爲適禮之常經卽此可以表
孝心世有忘哀反作樂視此不如獸與禽我偶行役過廬下拜墳叙闕日將夜明年
再至觀民風定有三邦克成化

五言絕句

鵬灘霜嶺

麥徵

山雲中墜霜花石面浮渡時三老懼竟不絕行舟

石壁秋風

水面芙蓉起穿雲徑路回千巖動蕭瑟作賦愧非才

登嶼聳環

湘妃疑此涉恍惚露鴉盤珠翠年年麗行人鏡外看

劍江春漲

神物屯風雨春波失渚汀歸人呼野渡渺渺隔江聲

東山夜月

翠擁孤城逼襟分鬱繡流松頸灣不動秋色滿簾鉤

赤峽晴嵐

青帆摩元漢東山鎖碧湍薜蘿朝散藹蒼翠蘸波寒

谷山列障

錦屏開隔水四面渾難分障住西風急江鄉煖似薰

李純

邑歲貢鍾思賢

七言絕句

鐔江即事

宋 黃庭堅

閉門覓句陳無已對客揮毫秦少游
二子不知溫飽味西風吹淚古藤州

石壁秋風

元 麥 徵

千尺丹崖削石屏波光倒樹水雲行
何當借我烟霞榻臥聽泉流看月明

鴨灘霜籟

中流亂石水交叉滾滾寒聲帶雪花
霜月不隨流水去只將秋色伴漁家

赤峽晴嵐

水氣初生雲氣浮山林不辨鳥聲幽
天風吹入三竿日草色依依水遶洲

藤江

明 解 縉

三月藤江聽子規烟花細雨濕征衣
遙知鄉里逢寒食處處人家土塚歸

劍江春漲

李 純

昨夜雲生桂井東春來一雨一回風風吹花縣傳香遠雨漲藤江流澤隆

石壁秋風

石削層崖倒樹松涼生六月起秋容官清不擾遊人樂繫艇松根聽曉鐘

鴨灘霜籟

石激波濤湧玉虹絃歌相應水聲中雪花浮動雙鳧起飛入彤廷對殿楓

龍巷露臺

水落江寒十月冬平臺永巷露靈蹤春來水滿江湖闊雲起龍飛到九重

谷山列障

玉樹凌霄谷嶺峰疊排錦帳若崇墉菁葱遠映甘棠色仰止於今只有公

登嶼聳巒

高聳雲巒不爲夫中流砥柱勝蓬壺茂林翠映湘妃竹仙令清還合浦珠

東山夜月

月映浮金盞，碧瑤東山山水連。
漪君侯惟飲藤江水，對月何須畏四知。
赤峽晴嵐

嵐晴瑞起白雲間，坐對終朝愛此山。
巖下維舟不忍去，琴彈流水暮潺潺。

藤江

桃花浪映錦鱗肥，白髮漁翁罷釣磯。
柳底繫船篷底坐，滿前鷗鷺已忘機。

過霍榮祖墓

明徐瑞

金雞一勢繞金城，城下溱洧繡水清。
千古塋封知霍氏，松陰滿地白雲生。

舟過藤江卽事

明李全善

桃花春盡雨聲中，洶湧波濤浪拍空。
鷗鳥不知江遠近，往來相趁白頭翁。

五言律詩

憇金雞驛亭

明劉崧

綠雲上驛亭，春色正冥冥。
千樹棠梨白，滿山蕉葉青。
碧潭開匣鏡，秀壁擁帷屏。
尚說

容州遠舟行未可停

下馬

下馬度嶽岑千溪復萬林含沙宜鬼箭飛艸畏蜚鍼火種通搖谷山歌雜成音逢迎
暫投息起坐劇愁心

藤縣即事

成化侯官人黃 鎬(左布政)

藤江行數日隔水隱人烟兩岸山如削中流急似弦鳥鳴深樹裡舡係急灘邊遙望
容州地淒其思愴然

七言律詩

經藤州驛

宋 劉志行

驛使何曾寄嶺梅古藤花下小徘徊無名異果自成樹沒字殘碑半是苔木杪山雞
知且畫江心仙島欠樓臺灘神憑險成遺廟笑我何因到此來

浮金亭

宋 趙崇德

危亭我到三登眺，帶酒尋花鬢似絲。
日射沙明金錯落，風迴波轉浪參差。
酒闌東李誰同姓，老去眉山未有詩。
自笑常爲疎散客，安知何日是歸期。

桂山井

明富禮

桂山山下注瓊漿，石眼流通一脈長。
釀酒如飴清有味，烹茶似雪淡生香。
天光雲影涵虛白，魚躍鸞飛見渺茫。
泉石烟霞成老癖，常資涓滴潤枯腸。

東山夜月

林孔嘉

譙門風細漏聲遲，太岳靈峰淨掃時。
一片月輪從海上，九天清影落天涯。
浮金獨有坡翁句，照水空傳衛國碑。
圓缺陰晴那可定，南飛烏鵲夜何其。

將至藤州喜賦

劉崧

孤城隱隱見中流，八漿翩翩送客舟。
山擁瘴烟迷柳碕，水穿石磧下梧州。
寒暄異景愁深入，言語殊方強笑酬。
莫歎羈懷勞北望，且勤王事賦南遊。

藤州卽事

解縉

繡水東來合鬱江古藤城郭鎮南邦山雲橋渡飛虹並江月樓空乳燕雙晴日鶯花
紅錦帳春風烟柳碧油幢吹簫喚起蛟龍舞金鴨香焚列玉缸

龍灣

傅惟宗(舉人)

石窠藏靈自古聞碧波無底浸江濱水枯忽漲二三尺歲熟加收四五分神物蜿蜒
蟠地軸靈光歛熠動天文太平有象今全見白日晴噓五色雲

過十二磯

桑悅

亂石危磯急瀨聲扁舟汎汎水中萍月當秋夜十分白天到遐方一樣青引路峭船
鳴鼓吹前山軍堡出旗旌回頭便有開懷處無數峰巒出翠屏

五屯即事

吳廷舉(蒼梧進士)

屯移古贈小江頭江際孤城城上樓山勢昂藏趨天府水源紆曲自濠洲三農種稻
秋無望六月千戈戰未休藤斷峽空高鳥盡邊人千載仰韓麻

過霍榮祖墓

徐瑞(邑舉人)

孝子山頭築夜臺東流不盡古人哀孤猿獨鶴聲相送白日黃泉眼共開陶侃自能逢卜地王哀惟恐復聞雷倚廬靜對寒江月幾欲乘舟酌一杯

谷山列障

霍榮（邑舉人）

奇峰壁立勢崢嶸斷截長江一派橫萬丈蒼崖凌漢碧千尋古木拂雲青嵐取天際開新畫雨滄江干列翠屏欲擬飛仙登絕頂題詩何必問山靈

赤峽晴嵐

兩岸高峰峙水湄丹崖矗矗勢嶽崎淡烟縹緲環青嶂紫霧氤氳透翠微峽口風生秋氣爽巖頭雲度夕陽遲謫仙去後空陳迹小洞荒涼白鳥飛

浮金亭

明袁衷（梧州太守）

東山旭日正瞳瞳萬片金鱗映水中錦繡晴舒寒浸豔玻璃光濛碧波紅訝看暘谷飛輪動彷彿錢塘湧雪同坐對蒼涼蘇病骨令人清興憶坡翁

藤江漫成

明謝少南

四山殘月半帆風亂石洞波委折通可訝寒江猶碧艸忽從歧路轉丹楓冬回氣稜
消沈後北望星辰感慨中勾漏西來知不遠將因煉鼎問仙翁

五言排律

登藤州

唐宋之間

朝夕苦過征孤魂常自驚泛舟依島泊投館聽猿鳴石髮緣溪蔓林衣拂地輕雲峰
刻不似苔壁畫難成露浥千花氣泉和萬籟聲攀幽紅處歇蹈險綠中行戀結芝蘭
砌悲纏松栢坐丹心江北死白髮嶺南生臙魅天邊國窮愁海外情勞歌意無限冷
月爲誰明

詞

藤州與客誦夢中長短句(好事近)

宋 秦 觀

山露雨添花花動一山春色行到小橋深處有黃鸝千百當面化龍蛇妖嬌掛空壁
醉臥古藤陰下杳不知南北

登嶼鐘巒〔木蘭花〕

李 純

一水中流孤嶼淨青螺半點湘妃影柳舒翠黛月如梳梅擁綠雲天作鏡凌波仙子
儂家近說到繁花嗤不信掉歌長繞蘆花深秋霜怕點青青鬢

四言古詩

明 湛若水

臘月既望我徂自藤雲木翳翳零雨其冥有山如戟有石如城雲餐雨立僕夫于征
聯我蘭舟與子同行念彼室處感茲靡甯

國朝各體

五言古體

秋日遊萬壽寺

陳 憫

滿院鎖秋光清風生四壁竹陰遊客來空翠衣間滴

六言古體

劍江春漲

覃上輝

兩岸平曠已沒劍江水滿知春夜雨又添幾尺曉來試問舟人

赤峽晴嵐

覃上輝

嵐光蒼翠欲滴赤峽好雨初晴莫問遊人樂否處處轉遍新鶯

石壁秋風

何宏元

一幅丹崖整潔幾行花木清幽瑟瑟秋風誰得往來幾隻漁舟

谷山列障

何宏元

西北青山高峙森然秀出羣峯生就一方保障春深黛色尤濃

義鷄歌

覃上輝

繡江之濱多軼事爭道唐朝宣撫使古藤州南獲鷄鵠墨羽金眸絕儔類旬月之後
教之言翦舌疏翎聊當戲誰知此鳥馴且靈日漸能言稱人意或歌或舞無不嫻應
拍赴絃如按轡欲將此鳥博君歡陳之王前姑一試宣之使言口如緘呼之令舞不
展翅只道微禽畏天威豈知孝鳥崇恩義不聾不鳴別有心巧言令色非其志遲之

又久尙如初王固聞之鶴始語爲言嶠南是故鄉別父母兮縈愁緒玉梗金粟雖備
嘗爭奈此身別儔侶自離故土見君王天北天南各異處兒旣慮母無所依母定悲
兒居逆旅不願金鑿近至尊但願南歸啄殘黍語未終兮淚已流輾轉翔鳴冀王許
王感精誠亟遣歸不使良禽悲失所復加饒渥賜金環鶴戴天恩歸嶺表何期歸至
舊巢中母身雖存魂已杳遂把金環殉母旁倫常大義鶴能曉至今鄉尙以義名可
以人而不如鳥

七言絕句

晚登東山尋浮金亭故址

蘇厚培

八月涼巾陟翠微浮金山上景全非行人莫問當年事衰草寒烟怨夕暉

浮金亭懷古

面面軒窗了不扃晚烟如翠暮山青東坡淮海俱千古不見光華舊小亭

五言律詩

舟過藤江卽事二首

祁 墳(廣西學政)

夢醒櫂聲急行舟曉又忙攬衣驚出日捲幔納微涼宿雨山泉響輕風岸草香藤州
饒景物莫漫惜蠻鄉

百粵文身地

皇朝德澤深不聞斷藤峽敢動跳梁心使節水雲際人家松栢陰探風亦吾責處處管絃

音

避暑水月閣

蘇 炯

何處堪逃熱南開水月宮蒼松遮烈日翠竹引清風說偈炎威退談禪暑色空披襟

石上坐四體盡和融

大梳嶺

蘇 炯

一派曉巖石依稀列齒文雨絲憑整理雪線任條分朝掠南山霧晚梳北海雲巨靈

櫛沐後拋擲落塵氛

望迴龍洲

陳汝琮

海上孤峰迴風光望裡幽
千瀾迴旣倒一柱砥中流
日落潮聲急雲開月影浮
推篷聊極目絕勝鳳麟洲

萬壽寺盤竹

胡現星

簣營依福地勁節勵秋風
品以琅玕重心隨色相空
蕭疎方丈外掩映小盤中
若問誰爲友清幽况遠公

七言律詩

新秋遊水月閣

吳鳳來

竹筠蕉葉碧玲瓏茅屋蕭疏似已公
留客茶瓜消暑清心鐘磬帶秋風
水光應與天光合花影知隨月影空
幾處招提忘垢淨禪機盡在不言中

題萬壽寺盤竹

吳鳳來

不學簣營新粉濃小盤寄托靜禪鋒
枝低應是搖風懶影淡還因篩月慵
貝葉青時

添冷翠柳絲零處覺秋容竹林高致蕭條在底事柯亭想蔡邕

劍江春漲

高攀桂

飛濤牂牁下劍江劍光灑激勢難降墨雲驟潑三春雨銀浪平封四面牕閣繞濤聲
疑蜀棧池連樹影繫吳纜此中恐有蛟龍蟄漫向延平供一雙

龍巷露臺

高攀桂

霖雨鴻濛戲九垓身閒常自臥江隈穿渠不陋偏成巷破壁通靈應號臺誤入遲迴
詢八陣獨登滂灑望三台噓雲變化原難測得濟蒼生便異才

文嶺雲環

高攀桂

迤邐文昌拱縣門千巖萬壑礙雲屯錦屏曲曲青堪拭筆格森森銳可捫芹藻香新
王澤遠侔夔夔韻古

聖居尊邇來靜夜篝燈下市地書聲出近村

谷山翠疊

高攀桂

長夏雲峰比谷山層層翠障列塵寰蔚藍天半堆螺髻碧玉流中浸黛鬟一笏衙齋
朝爽豁萬重畫樹夕陽閒每教簾捲西窗後疑挂丹青咫尺間

鴨灘霜籟

高攀桂

鴨綠灘頭水鶴翔清秋兩岸月如霜白沙磧遠蒹葭老紅蓼花疎橘柚香沽客酒餘
驚過雁漁莊火暗促鳴榔誰於萬籟蕭蕭夜獨和歐陽賦一章

石壁霞紋

高攀桂

媧皇片石聳江涯萬古長留五色霞春曉桃花迷薜洞秋風柿葉隱山家赤城岌岌
千峰護紫塞迢迢一徑斜底用髯蘇前後賦偶然問俗泛仙槎

東岡霽月

高攀桂

簾纖寒雨暗前川忽喜東山月破天絮卷白雲風淡淡花明烏柏露娟娟開樽獨對
情何限與客聯吟興灑然何處歌聲聽不斷衛公祠外打魚船

赤峽晴嵐

高攀桂

浩浩藤江去不休劈分石峽鎖中流
檣帆昔日晴疑雨竹樹藏雲夏亦秋
嵐氣收餘明寺塔水花團處浴沙鷗
欲看曉日騰滄海獨自欄憑百尺樓

題李衛公碑後

周誌勳(長沙人)

五花將畧世無儔正際陳隋正氣收
識布衣驚

紅拂眼上奇書請大王頭英姿褒鄂勳
同重真主風雲意自投僕射至今聲在
耳斷碑長護古藤州

李白巖

陳汝琮

碧磴丹梯隱接天伊誰流寓到峯前
夜郎羈縻傳開寶平越歸來是謫仙
讀罷祇堪尋納話醉餘惟自抱書眠
盛唐詞賦留遺跡一檢清平一惘然

石人嶺

霍廷櫺

伍伍參參聚半崗直如仙子肆軒昂
朝餐玉液捫心冷夜探靈芝入袖香
萬古儀容春不老千秋骨格性偏強
滄桑遞變知何許惟爾堅持立志剛

浮金亭懷古

蘇炯

雲雨蒼茫鎖遠烟，登臨此際興蕭然。
殘碑斷碣埋荒草，古木寒枝宿夜鴛。
文德先生歸兩浙，眉山夫子返西川。
風光亦與人同往，惟有江山似昔年。

李白巖三首

蘇炯

巍峨峭壁俯清漣，此地曾經臥謫仙。
嶺外白雲猶篆字，洞中瑤草障殘編。
山嵐翠霧餘詩料，石室幽閑憶昔賢。
一自騷人歸碧落，登臨翹首興蕭然。

乾坤是處謫仙才，碧澗香飄繡綠苔。
石室當年留醉客，詩魂此日鎖寒梅。
疏松影落空巖靜，細草春深小洞莓。
惆悵無因追往昔，參差烟雨暮雲來。

榕潭流水漫無聲，古洞空留昔日名。
幾片白雲文士跡，半巖瑤草醉仙情。
中天月照波瀾靜，夾岸烟迷暮雨橫。
詞客自從沉采石，夜來宿鳥爲誰鳴。

秋日登浮金山文昌閣懷舊（集唐）

陳儻

文昌新入有光輝，仙嶠浮空島嶼微。
路轉寒山人獨往，江涵秋影雁初飛。
惟將遲暮

供多病不用登臨嘆落暉惆悵舊遊無復到白雲芳草與心違

登江月樓懷古

陳 憫

江清月白四窗秋曾記蘇秦此勝遊南國逐臣惟縱酒西風懷古獨登樓灘聲樹影
他鄉夢水色天光異代愁今日歌詩人已杳通津門外有漁舟

秋夜集友泛舟石壁聞漁歌

陳 憫

邀朋探勝泛舟河石壁涼宵寄興多數點漁燈人倚棹一川明月客聞歌秋風名句
思前輩滄浪遺音感逝波笑問江湖舊知己蘆漪高調屬誰何

暮登文昌樓

陳 憫

密樹濃中辨不分層樓高倚值斜曛日隨山色圍平野心共鐘聲觸暮雲星散千家
還北拱月明孤館待南薰壯懷對此重開拓長嘯歌詩夜半聞

和水月閣盆竹

陳 憫

猶是搖風漏月容根盤淨域寄孤踪雅宜逸客評修短懶與枯禪比淡濃爽入新秋

難受暑勁餘古節宛迎冬參差萬箇塵氛靜時有慈雲護幾重

水月閣新秋和吳明府韻

陳儻

名藍積翠鬱瓏瓏遁跡雲林比遠公高閣遙吞千嶂月回廊斜受半江風何年法界
開初地此日禪床借四空政有餘閒秋又好山光潭影入詩中

水月閣觀漲

陳儻

水勢茫茫駭寸心祇緣高閣獨登臨誰翻巨浪湮交廣欲挽洪流洗古今萬點塵緣
歸汨沒一漚世界判升沉衆生若問迷津路苦海如斯幾倍深

赤溪懷古

陳學治

赤峽依然舊日溪茫茫遺跡不勝稽多年浪說仙翁去過客惟聞野鳥啼雨浥輕塵
花有淚人來古寺艸成蹊文章事業還吾輩水自東流日自西

秋日遊水月閣

霍士坤

參差古木影層層探勝閒將曲檻憑詩酒放懷原我輩山林得趣羨高僧白雲橋外

溪聲急黃葉峯頭鶴唳增到此塵緣何所着欲隨鷗鷺結閒朋

登赤峽李白讀書巖

李若桂 小山

赤峽山幽半繞嵐聞傳名勝喜登探春歸石磴花初暖客到荒臺鳥未語流水無心
留逸韻蒼苔遺句久包涵謫仙去後風聲寂洞口丹霞擁

碧潭

和寶家寨少府義昌江舟行次韻

李苦桂(小山)

東山東去復朝東戴月孤舟夾岸中今古不殊三峽水絃歌屢變百蠻風鳥啼巖畔
遷喬綠人語烟邨競女紅皇道蕩平無隱吏星槎漢使不時通

赤峽晴嵐

蘇秉正

碧嶂丹崖景曠然榕潭野色藹晴天雲林倚岫光風裡煙影含山霽月邊出米浪傳
巖下蹟讀書爭記酒中仙閒來倚杖遙登眺一帶峰巒入畫鮮

浮金亭

蘇秉正

藤下奇觀瀟水東雅懷高寄繼坡翁趣深風月程文德志樂林邱費克忠自昔煙雲
猶歷歷于今光景倍融融願留名勝齊陵谷佳興千秋與衆同

浮金亭

蘇秉星

由來名迹與人同樂寄巖泉想醉翁光景清高如放鶴逸懷淡雅擬扶風長依山閣
橫烟外好映江城入畫中遊騎時時亭畔簇不須芳草綠河東

紀德政簡六齋陳邑侯

陳乃書

華陽甲第冠梁州世澤長江合並流雲日五朝逢泰運科名八代顯殊猷家聲幾見
傳驚座豪氣真堪接臥樓不是太邱多令德鐔津那得遍歌謳

偕友人登萬壽寺觀音堂

黃源洙

山雲不鎖倩雲封直上蓮臺第幾重念佛漫尋三寶地會心且聽一樓鐘風旛動處
僧眠穩水月光時客笑濃明鏡無塵君記否由來定靜亦禪宗

重陽偕友登東山寺（限韻）

蘇厚埴

敢將筋力諉衰頹勝景良辰歲幾迴
眼底煙雲橫岫出尊前風物逐顏開
高吟有客能酬唱短句無端費剪裁
寄語攜壺東道主明年還待好音來

重陽偕友登東山寺(限韻)

霍士坪

廿年俠骨未曾頹名勝追歡夕照迴
半縷幽情閒處適滿天秋氣望中開
白衣酒向東山酌紅葉詩從九日裁
佳景良辰稱勝會更期明歲復同來

重陽偕友登東山寺(限韻)

蘇厚培

夕陽影散玉山頹憑仗誰將日馭迴
適意詩如秋色淡醉顏紅映晚霞開
談餘珠玉隨風落歸去烟雲帶月裁
只恐下方人暗數錯傳仙客洞中來

與客登東山李衛國公祠

蘇厚培

閒隨朋侶陟危巔四望悠悠渺然斷岸雲沈寒
渚水滿城烟動夕陽天古祠未定誰人築
遺碣依然此日傳最是夜來明月好幾回題咏入詩篇

浮金亭懷古

蘇厚培

登臨無復見坡翁此地高歌與不窮
秋草離離原上白殘霞片片日邊紅
千秋風景於今異二水波瀾自古同
我到寒山頻弔古不堪斜日對西風

劍江觀漲

胡世振

二月龍塘春水生波光激澗接蒼溟
桃花浪湧魚初躍柳絮風迴雨乍晴
天地升沉舟一葉乾坤浩蕩月三更
使君去後留遺跡劍氣年年尙縱橫

謁藤州馬伏波將軍廟

陳乃鳳

萬里南征白首年掃除側貳靜烽烟
勳名不署雲臺上祠宇還瞻繡水邊
馬革裹屍心自壯明珠得謗世常憐
漢家滄海遺容在山色江雲曲檻前

夜登藤州東城樓望東山月

陳乃鳳

高樓獨上雁來天遙望東山月正圓
壁彩蒼茫霄漢表金波浮動繡江邊
雲消荒麓寒疑雪露灑空林碧似烟
隔水闌干人小立雙吹玉笛不思眠

谷山列障

陳乃鳳

崢嶸列障劍江灣自是藤州第一山地簪翠屏流水曲天開畫軸彩雲間三秋蘆樹
含風冷二月巖花笑日閒不盡懸崖連峭壁挂笳携展許誰攀

鴨灘霜瀨

陳乃鳳

鴨灘洲畔夜飛霜寒瀨濺濺一派長清淺影涵楓葉赤漣漪光濛荻花蒼涼生玉液
憐秋節冷浸冰心愛夕陽爭似桐江流七里子陵竿拂小漁航

劍江春漲

陳乃鳳

流鶯百轉畫城春城外江濤漲滿津紅蘸林園花似綿綠涵山郭草如茵斷崖縹渺
漁歸晚高閣蒼茫客倚頻雙劍久沈波萬頃濯纓人愛趁芳辰（唐採訪使携雌雄
二劍躍缺化龍沈于淵中）

龍巷露臺

陳乃鳳

天門龍上不重回清露瀟瀟灑石臺麟甲千年存臥巷珍珠萬顆點層苔秋風悵望
漁吹笛明月登臨客舉盃祇快春深江浩渺探奇難撥水雲開

劍江春漲

石漢

淼淼春江水接天，
鐔津晴日放漁船。
山迴曲岸青千丈，
風靜波平綠一川。
倚棹何人懷古劍，
枕流有客賦新篇。
閒情不盡斜陽外，
鷗鷺飛飛破晚煙。

硃井醴泉

胡現星

硃砂凝結不知年，
井底于今釀醴泉。
延壽豈居丹液後，
醉心應在菊醪先。
玉壺夜汲春膏閤，
石鼎朝炊活火煎。
至味自同甘露美，
萬家歡樂如仙。

藤州攀轅詩跋（爲明府陳六齋作）

李中寶

蓋聞治化之隆，多由循吏仁聲所播。端在醇儒，故溯茂異於漢京羣推，卓魯企典型於宋代。共仰關濂我教師，本清白傳家以廉能著績。誕生涪水，出宰鐔江。携琴鶴而來清風，載道懸鏡。蒲而治光氣滿堂，甫及下車，即憂心於葺屋未臻，考績蚤馳。譽於建陵，憫荒土之艱難，奠民居如勤家事，求衆情之盡謐。尙秋肅無害，春溫育才則進。比聯蟬聽訟，則閒堪羅雀。誠足擬良翰之公明，紹太邱之仁愛者也。乃我藤願復緣。

慳縶維計拙憶昔望君如歲來暮興歌方今惠我無疆遂初竟賦慈雲嶺上廟欲圖
形讓水河邊碑成墮淚立馬鬪洲之側士女攀轅揚帆塔院之濱紳耆繫纜爲鳴琴
之化賢聲遍頌於茅檐賡祖席之章德政聿揚乎桂海藉非竇心竇政胡爲斯愛斯
傳中竇立雪情殷傾陽志切戀雙旌之遠別莫罄瞻依欣四載之親承同申感咏付
之剗剗裁成一邑新書彙以篇章繪出千秋遺愛儻此日由詩觀政定當採自轡軒
若異時徵獻考文亦必垂之史乘未堪表揚循績聊爲志述謳思謹跋

贈邑侯陳六齋

吳斯壁 崑岡

澤溥甘棠蔭尙餘三年循吏術非疎藤牽舊院閒調鶴人到公庭半著書蚤識紫
浮空外過曾拋露布劫中除陵風雨峨帽雪肯負蒼生竟遂初

送邑侯陳六齋

胡世拔 迥士

史雲甑內粟無餘作宰神明治豈疎愛士捐廉營塾序化民垂教本詩書數年德澤
滄肌髓四野苞稂漸掃除莫謂頭銜今昔改

皇恩優渥總如初

澆漓今已俗還淳祇爲蒼生計此身潔白一官心若水艱難數載飭生塵爲霖爲雨

占豐歲宜猛宜寬本愛人翹首燕臺

恩眷渥銅章遙賈看垂紳

累葉科名舊世家文章經濟志非賒鳳毛濟美排金馬棣萼聯輝映墨花鎮日賢勞

清案牘頻年風雨足桑麻慈君去後知誰嗣目極卿雲五色華

知公高志在東籬轉瞬鶯遷定有期現宰官身甯久息舍甘棠樹是相思旌旗就道

歌來暮士女攀車重去時慙愧未酬培植德空隨桃李負吾師

登藤州書院文昌樓

陳翹

巍峨深院峙高樓此日登臨豁遠眸春隴山光迎座入雨晴雲氣到窓收文風乍振

懷郎簡教化重敷憶太邱十二闌干欣徙倚斜陽何事急西流

夜泊赤峽望謫仙巖有感

黃元崇

春山觸目感遺蹤往事淒涼落照中一代高人無定趾千秋荒洞想流風斷崖細草
分苔碧曲岸漁燈點水紅酒興詩情何處所抗懷欲問大江東

登東山謁唐李相衛國公祠

盧壯度

李相祠堂絕巘中凌雲微雨捲雲風階前芳草肥新綠門外飛花散落紅西岳上書
占早遇晉陽擇王建高功藤州俎豆千年在自有甘霖滴馬風

石壁秋風

石源

嵯峨峭壁俯滄洲蕭瑟涼颺起素秋簪菊客臨秋落帽釣霜漁過快移舟斜吹墮葉
旋羊角低拂迴波捲鴨頭最好崖邊閒把酒夕陽樹外看江流

九日與友遊水月閣

胡孫騷

敢誇裙屐舊名家話是登高興便賒秋水碧烟依野寺夕陽紅樹亂江霞題詩如我
慙劉敞落帽何人笑孟嘉惟有諸君詞賦好相携分點老僧茶

谷山列障

黃時安

門對谷山山對門天開屏障列江村霏霏春雨凝朝霧颯颯秋風聽夜猿百丈嵯峨
梯可度九重星斗手應捫開來買得謝安屐不畏巉巖虎豹蹲

舟過赤峽

霍錦

橫逐秋黃日色晴綠紋微縐午風清征帆一片衝雲疾峭壁千尋挿漢輕寺外雲飛
潭底影巖前鷗趁水中聲詩成不覺頻回首覺壽風光鴈陣橫

登東山李衛國公祠

霍鉉鏗

自古英豪有幾人千秋廟食古鐔津上書壯氣搖山岳拔劍靈威泣鬼神碑在未教
風雨蝕花香不滅物華新荒涼臺榭知多少惟有名祠億萬春

登浮金山文昌閣曉望

胡世揚

危樓高結出塵寰一道文光繡水環初日影迴江樹白遙汀風定釣船還城中烟火
千家近檻外雲霞四望閒任是俗氛飛不到置身如在九霄間

東山祠

石廷琿

攀陟東山景古人馨香烜耀久鐔津千秋劍氣咸如濯三問書成信有神威著南交
祠並固文連北斗字常新憑欄徙倚增豪興漫對墻花惜暮春

登東山

李中寶 韞輝

東山絕頂豁雙眸萬境蒼茫一望取雲散谷嵐千嶂列日涵潭影片金浮名祠劍氣
凌霄漢高閣文光射斗牛最是月明堪愛處水天清徹古藤州

藤州書院示同學

陳 鑰 啟亭

理愈平中觀愈奇先民矩矱是吾師讀書須會無書處立志終逢快志時眼底境皆
呈妙趣口頭話便可爲詩鴛鴦繡出金針在相對忘言各自知

贈孝廉陳啓亭

高攀桂

太邱德誼久流芳經籍傳家世澤長代有文名香八桂官流清譽重三湘聚星里自
爭模範驚塵才誰與頡頏敬仰高山聯俚句敢將檇櫟比甘棠

贈孝廉胡迥士

高攀桂

安定芳徽代有聲家憑詩禮紹管纓看標桂籍香藤水聞樹棠陰在晉城千仞鷗鷺
驚接翅雙枝花萼自爭榮惟教世守蘇湖業經義翩翩永令名

贈茂才卓韶齋

高攀桂

循吏休聲振漢朝雲祇今復見聯鑣福田慶積心原厚鳩杖齡延德自超禁苑藻香
知制誥河陽花滿聽歌謠更看鶴骨珊珊老絳縣何如甲子饒

贈明經李小山

高攀桂

光輝家世本青蓮經笥便便舊學傳道味深醇容婉若詞華爾雅意翛然小隴月滿
詩盈篋釣艇花飛酒泛船竚見鱣堂舒化雨菁莪棫樸樂爭先

紀 秋崖高明府德政步和見贈原韻

陳 鑰

懋著賢勞百世芳清和琴韻雅音長明威肺臘時昭雪（明府以噓嗔明威折獄不
辟肺臘）忠信蘋蘩早濯湘（明府前令武宣牧養利忠信廉潔之聲早著）穗秀
直教稂自剪（有巨盜過境以刃指糜羣從曰速去毋擾藤地）鴻飛一任燕相頤

(明府具鴻才修志命鑰勳事且贈以景仰高山聯好句一詩搗謙彌甚)文章經濟傳佳郡不向東風問海棠(弭盜安民永平遂成佳郡非必如淵林以海棠香爲佳郡也)

胡世拔

都門昔已著循聲(明府初爲兵馬指揮大有政聲爲上所重)粵水重來咏濯纓(十一年明府任武宣二十一年復至粵卽於是年署藤清潔自持爲兩邑所欽仰)修史有才頗珥筆(明府任武宣藤縣俱主修縣志)保民作父仗干城(明府勤於政事洞悉民隱而尤急於弭盜下車之處盜息民安)高談經濟三光現宏獎風流一字榮愧我蘇湖未能紹謬邀青盼獲知名

李若桂

品擬亭亭茂叔蓮潔清自愛更堪傳笙從堂下由庚起(明府蒞治士民各得其所)藜向樓頭太乙然(明府以明經倡修縣志)渤海刀歸南畝犢(明府到任弭盜)

有方）鬱林石載劍江船（明府潔已愛民廉隅自飭）獨慙白髮邀青盼強與羣
英列後先（明府命桂叅纂邑乘深慙謝陋）

步高明府見貺原韻

卓鳳儀 韶齋

宏才出宰贊

熙朝自陝之藤暫駐鑪績著旂常文治洽名垂誌册典型超甘棠惠澤民蒙蔭杖杜風流
路載謠靜聽鳴琴觀德政更覘爵秩倍豐饒

紀 秋崖高明府德政

吳盛銜 聘臣

循良作宰牧藤州惠澤覃敷到處留考績不須三載後與文已見一年週光騰石鼓
霞橫砌曲奏瑤琴月滿樓竟日書成榮策府榕陰堂上樹風流（明府倡修縣志不
竟日而成衆紳耆恭以樹之風聲頌其德政）

贈廣文蘇器亭

高攀桂

浮金亭子濂金波曾見眉山發浩歌此日雲祇能振鐸他年風韻必鳴珂賦臧赤壁

千言在酒釀黃州百斛多爲掬劍江江水飲心肝照澈憶東坡

贈廣文吳崑岡

高攀桂

白沙庄上久流芳鵲時鸞停姓字揚已植菁莪蕃慶郡還栽桃李滿河陽祗爭飛帛書盈軸不酌貪泉水一觴式穀更欽君有子藤州處處說琳琅

恭紀

秋崖高老先生德政

星沙 朱時若

載道謳歌震嶺南個中消息許誰探民瘼日日腸迴九國法條條折肱三共說河陽滿花縣羣誇清月印江潭輸將踴躍與情淡疆宇救甯德意酣志乘悉勞名手筆詩詞多費吉人函一官長物知無有贏得賢聲在在談

恭紀 秋崖高明府德政步和見贈元韻

蘇厚植

千頃胸涵叔度波澤流鐔水起謳歌買牛已見黃雲隴（侯弭盜安民）策馬曾傳

白玉珂（侯以內官外擢）鏤管彙函芳信遠瑤琴一曲落花多公餘擲下琳琅句
浣誦深慙學士坡（侯以繼美眉山相勗獎借殊甚）

吳斯璧

樸藻摛華字字芳藤江繡水政聲揚丁年筮仕

叅寓亮（明府初任指揮）乙夜編書啟酉陽（明府倡修邑志）阡陌羣安三日

耜（盜息民安蒼黎樂業）縉紳共上九霞觴（闔邑士民躋堂獻頌）揮絃譜就

南薰曲恍聽雲璈奏八琅

藤縣志卷之二十

送祁中丞○調任廣東

卓 儻

三十年前秉鑑衡鑄錫多士仰公明於今開府蛻旌降每爲憂民鶴髮生大地恩膏
周桂嶺雄藩節鉞壯羊城東西粵嶠無分域總人忭懽聽頌聲

送劉習齋太守罷職北回

卓 儻

家居仕宦在皇都抗直生成胆氣纍十載題輿盟白水一麾出守莅蒼梧南陽吏喜
懸蒲化東海民歡臥閣圖得失塞翁心有主揚帆笑過洞庭湖

其二

福星移照自杭州郡沐仁風已八秋高義雲天誠可薄深情膠膝久相投慙無薤水
酬佳意喜有棠陰紀美猷琴鶴歸來身益健城南車馬看如流

題陳搏福壽字

卓侗

巖壑頤真藉玉編繪圖讀易契先天山間一覺百餘日世上頻驚千萬年服氣漫云
方外士協心惟助省中賢蘭臺石室仙風古筆勢游龍福壽傳

卓傑
卓傑母九十壽辰燕集屋脊數百誌喜

卓傑

燕喜當年嘗頌賡吾家燕集滿簷楹時因白髮慈親壽天使烏衣子弟鳴青鳥變爲
元鳥至九齡定見百齡盈千秋異事今須記援筆題詩表子情

步韻

卓侗

燕賀會聞大廈成今因慈壽集簷楹二千結實將桃獻九十長春以鳥鳴拜舞喧聲
羣季樂團園和氣一堂盈康彊自有無疆福百歲休徵驗物情

觀音閣第一好讀書

觀宇臨江靜且幽音聲傳播遍遐陬閣前潭影清如許第外林烟翠欲流一覽萬般
收眼底好將衆理悟心頭讀餘夜半抽簾望書劍光芒射斗牛

題訪蘇亭

坡翁遺跡傍浮金慕古情殷挈伴尋舊趾雲封思鼎建新亭霞蔚慶咸臨宵瞻明月
襟懷暢曉矚長江劍氣侵從此東山添勝境遨遊人士頌棠陰

咏統嶺兩石人

卓傑

何代雙星降碧天化爲兩石鎮江邊衣冠端拱人相似品格莊嚴貌宛然外向應爲
驅瘴癘內朝當是保安全遙遙七里人多慶誰憶此間有二仙

蘇學士歸院

恩貢 覃上輝

銅荷雙炬焰初張學士榮歸夜未央玉局標能才特異金蓮勅送典非常騰輝爛益
臣心赤散彩遙分帝室光前代令狐曾有賜後先濟美姓名香

漁羨牧

浮家泛宅只孤舟何似深山去牧牛扣角有書林影靜脫簑無事笛聲遄時當日午
眠苔褥懶臥荒坡上酒樓我向江干傾耳聽一鞭殘照送輕謳

嚴子陵釣臺

增生 覃啓夫

先生芳躅著江頭抗節高風孰與儔淺淡蒼苔思獨釣蒙茸碧草憶披裘孤臺七里
灘如昨片石千年跡尙留遺趾猶存人已往登臨惟見水悠悠

其二

把釣當年跡未湮荒臺依舊峙江濱苔青曾坐神仙窟石古嘗躡聖主賓風雨不摧
思勁節波濤莫損憶高人河山勝景先生備並著千秋有富春

藤江竹枝詞

府廩 覃煥邦

石人山下放輕槎未泊藤州日已斜不是榜人輕着力只緣水淺要爬沙
停舟憑甲美人墳芳草萋萋對夕曛塚上梅花三兩樹參橫月落覓精神

謁伏波祠

邊其晉

南天自古限江河猶記當時馬伏波銅柱曾經標粵界鐔津永不混蠻歌掃除貳側
烽烟淨分謗五陵薏苡多芳草年年春浦綠長留廟貌聳山阿

其二

山色連朝霧不開此翁矍鑠據鞍來屍還馬革心仍壯謗起明珠志未灰猶有英靈
依繡水那須姓字表雲臺漢家官闕今何在帳殿巍峨酌玉杯

謁東山李衛公祠並觀遺碑

邊其晉

六朝王氣已全取壯志凌雲恨不休物色風塵驚執拂輝煌事業想垂旒南天祀有
青山古西岳書陳白帝愁道是浮金亭畔路衣冠永拜古藤州

其二

陳隋事業等浮眠珍重碑文億萬年赫赫勳名垂薄海堂堂遺像在凌烟青山有祀
終留愛紅拂無心自識賢我欲登樓重悵望澄江夜月幾回圓

登赤峽李白讀書巖

邊其晉

石磴紅泉不記年登臨猶自問前賢春回渭北仍詩霸月照天南是謫仙異境山長
留赤水孤峰人尙想青蓮桃花洞口依然在彷彿有書聲到客船

其二

當年豔說李詩狂何事君曾謫夜郎剩有歌詞衡子美能將社稷識汾陽魏峨峭境
浮金界清雅飛仙倚石牀姓字不隨流水去遊人又醉紫霞觴

訪蘇亭懷古

邊其晉

披仙亭子俯城中南雁飛來夢不通玉局樓前山盡綠金浮河畔樹爭紅湖邊綠結
三生石嶺表清留兩袖風鐵板銅琶人去後不堪重唱大江東

其二

梧江纔過劍津頭坡老詩篇不勝秋曾許文章留赤壁那堪魂夢託黃州西湖烟雨
三聲笛南粵風雲百尺樓寄語訪蘇亭畔客青山長在水長流
藤州八景（六言古體）

邊其晉

劍江春漲

延平曾聞劍合藤水潛藏臥龍時作春雷一轟霖雨已遍三農

石壁秋風

峭壁天然如削孤峯砥柱中流一曲高歌誰繼武陵留待漁舟

龍巷露臺

巷口龍潛何日石上鱗甲斑斑不知秋雨春露千古常在人間

鵬灘霜籟

鵝鶴不整喧厖蓬島而今清淺雙鳧飛去隨波知是仙源不遠

登嶼翠鬢

卷之二十 藝文志

（九百十一）

湘妃危立峰巔時露雲鬢霧鬢中流洲渚獨峙一雙燕尾輕翦

谷山列障

百二重關關就谷山一帶翠屏天然付與保障呵護不須巨靈

東山夜月

登樓幾回望月少焉已在東山浮金亭下秋水可有詩人往還

赤峽晴嵐

檻外晴江如練烟嵐樹色分明遊人不辨昏暮渡口孤舟已橫

藤江卽事古風

邊其晉

鐔江城外大江橫江上烟波似掌平山長水遠稱險峻乘風破浪幾人行伏波到此
曾封拜（馬新息侯受封於藤之霸利山庄永樂寺）白首征南志不隳謗成蕙苒
皆明珠掃除側貳如拾芥衛公奮起興大業快劍斬開大藤峽晉陽擇主建奇功書
上西岳鬼神怯當年巨眼識紅拂俠氣無如虬髯客一局未終且袖手東王扶餘受

封冊唐室再傳又幾年詩人爭說李青蓮遠謫夜郎經此處曠世詩才酒中仙安石
誤國宋代愁坡老遷降此遠州至今訪蘇亭畔過如聞髯翁戲子由山谷詞賦光千
古更有淮海秦少游劍江文運實天開舜敷大紳皆異才永熙事業昭日月理學文
章新建來山川靈秀多鍾毓後先賢哲爭崛起馮公當世重三元叔姪祭酒稱李氏
父子掄元能濟美人羨喻家賢喬梓總制三邊袁元素擎天柱石人爭慕只因三字
莫須有萬里長城難鞏固我來藤江又幾春今日復飲浮金水安定昆玉無比倫竭
力倡始除荆榛霍家曾經標漢史姚驪偉業貽後人歐蘇兩姓多賢俊廬陵眉山有
傳薪力挽狂瀾鯨鯢斬劍江波浪盡回春循良卓氏兩代同西晉南粵表清風憶昔
君捷南宮日此地霜花滿地紅秋風落葉不經掃安民則惠翦沙虫芟刈萑苻少餘
孽借民之力能清野安得廣廈千萬間庇盡寒黎歸宇下宅爾宅田爾田民無魴魚
政無害馬

書鐔津考古錄後（用十卦六十韻）

舉人 蘇時學

藤居大地間渺小僅如芥自漢唐迄明分合異疆界東西枕其衝南北距爲寨（寶家白石）提封嬾魯衛方域陋邢鄴谷嶺鬱嵯峨鑿江湧澎湃賢哲實間生馮袁最豪瀛馮以高科傳先自鄂州解袁以邊才顯嘆息長城壞遙遙東山師清風流梵唄至今文字禪猶能警聾瞶淋漓衛公書斫馬見雄快想像天人姿淮陰恥嬰噲堂堂玉局仙南遷無芥蒂愛茲江月寒嘲謔弄狡獪風流仰羣賢鄉邦作佳話羊公碑不磨邵伯棠勿拜石齒形如梳爻山列成卦秦女墓傳疑令公像誰畫（令公祀宋李師中今訛爲靈公繪三頭六臂之像）化貍俗虛誣參龍語荒怪鷄塚環獨殉鷲城劍還挂鯖點目愈明蛇治風可瘥秋江幻魚鳥春筍壓葱薤鐵梨奇益堅金欖苦難嚼石爲刀必銛銅作鼓誰韞衆說紛流傳如食（去聲）雜疏稗孰能溯淵源一別支派慙余溺鄉里卓識謝通介懷古動遐思廢書發長唱奇曾二酉探志勿三餘懈翦燭蒲屢編漂雨麥亡晒潛心校必精焯掌勤自動孜孜嗜成癖矻矻獲柳芥文筆搜琳琅詩篇吸沆瀣非獨補圖經尤能關勸誡譬如植嘉穀當先去黃稗又若治

絲麻慎勿棄菅蒯餽核羅珍饈壺漿防餒餓裘集腋易成珠韞積難賣自排三十卷
聊償百年債大海網珊瑚明堂重琮玕富當窮五車功無虧一簣嘗聞古至人息心
去機械入荒豈云遙片念已能屆胡爲滯方隅而坐論成敗徑徑徒自豪齷齪吾已
隘未免譏伏轅固將鄙荷蕢驚心念桑梓咫尺通警效傷哉莽豺虎毒矣甚蠶蠹揭
竿羣負嶠樹柵各營若慘淡遍野原焚燒及官廨版籍痛淪亡黔黎苦凋瘵驥碌碌
空嗟鴻冥冥莫斂常山舌尙存睢陽齒猶齟彈琴咏四愁襄裳歌五噫謝客書作朋
邀月酒爲价沈沈鶴夢閑噦噦蟬聲喝（去聲）天心見應復人事利用夫和風蕩
妖氛上藥起瘡痍庶幾文在茲莫遺誤重註竊效虞人箴無忘後車戒

余孝子歌

孝廉 蘇時學 琴舫

藤義昌鄉有孝子明天順間爲余全風流文采未弱冠已補博士弟子員父玠作官
官順德父沒還鄉遇流賊母李陷賊去追呼莫能得仰首高天空默默沿路烽烟慘
昏黑返我田中廬鬻我舊琴書傾家贖母當何如賊曰爾宦家子豈與齊民齒不羣

金如山爾母終不還泣向穹蒼還默禱嗟爾豺狼竟難飽流涕向賊言我生本孤苦
我室有藏金我母未肯語不若縱母歸持金當贖兒以目視母母會意賊縱母去子
爲質母去矣久不來羣賊始驚疑知爲孺子給轉詰孝子孝子瞋目大罵安得有此
不義財吾父作官清白吏家中未築黃金台吾恨不能刃爾手萬段烏能以此纍纍
之物奉爾哉嗟哉孝子罵賊死百世清風播蘭芷我爲作歌歌以紀傳述人間備青
史

題浩氣吟二首

蘇時學

明留守瞿忠宣公式耜暨督師張忠烈公同廠殉難桂林時作

當年將相重臣俱保障西南守一隅運去朝端爭洛蜀天留晚景見桑榆荷戈百戰
心猶壯捲土重來勢已孤剩水殘山成底事可憐勉強尙支吾

孤臣力盡自登陣諸將流亡事可知百粵河山留正氣千秋風雨護靈祠易名早見
昭忠錄（國朝皆予謚）琴表空吟絕命詞應與宋元分鼎足（宋末馬暨元末

也兒吉尼並守桂林殉難）一堂終古凜鬚眉

題登巖二首

蘇時學

藤縣南三十里人跡罕至深廣數丈乳泉滴瀝當巖處荔枝一株婆娑蔭滿每歲結實纍纍小大各異洵異樹也中供浮屠像傳爲鄰邑飛來者俟異日續遊者考之

懸崖驚見石嵒崢宛委藏書古未曾讓我超然勝雲鶴更無人處獨攀登
濛濛花雨荔奴開萬古空山老異材贏得路人誇勝境從前佛也愛飛來

題訪蘇亭四首（次溫心山明府韻）

蘇時學

溫名鵬聊江西石城人建亭於浮金山麓以奉蘇文忠公

想像髣髴蘇合鑄金當年笠屐費追尋曾傷鈎黨三朝禍忽喜危欄百尺臨俯仰亭臺
皆入畫蒼茫風雪幾回侵同時尙有秦淮海何處藤花醉夕陰

宣和遺墨抵兼金前輩風流畧可尋地隔瓊雷遙景仰天開圖畫費摹臨一廟香火

緣重結幾度滄桑劫莫侵後視今猶今視昔蘭亭何獨重山陰

郭外黃花色散金冷風吹帽客重尋宦途振觸三生夢賓從遙傳九日臨大筆淋漓
題句在小樓清迥絕塵侵錢塘好繼坡仙蹟隄柳毵毵百里陰

笑却人間暮夜金高風還與後人尋一時藝苑留佳話萬里長江獨俯臨月色依然
浮白好宦情未許軟紅侵新詩爾日爭傳寫唱和應如鶴在陰

元普顏尚書墳四首

蘇時學

尚書名普顏帖木兒順帝末以便宜行省事於粵西適明兵下梧藤尚書率所部
力戰死之邑人葬之登鏡之原

何代無忠烈藤州獨此墳空山尋舊跡故國補遺聞名僅存青史身還裹白雲殘碑
零落盞醞酒立斜曛

一代奇男子元時老尚書臨危偏慷慨憑甲爲歛歛馬鬣封猶在龍章寵已虛江南

余闕廟比擬定何如

閩廣淪七日烽烟慘淡中表難通絕域臣自効孤忠湖海清流盡（時同治官張翔赴水死）乾坤浩劫同君恩酬一劍熱血洒西風

父老哀忠義衣冠葬異鄉魂應歸朔漠世已歷滄桑古墓樵蘇禁空山俎豆香精靈在鬪斗夜夜吐光芒

孫典史

蘇時學

孫典史懋慈谿人明正德年爲諫臣立朝蹇諤有奇節手折鹿角批龍鱗世廟繼立朝政新建言風骨猶嶙峋豈知羣小競側目一官遠謫鐔江濱鐔江何遙遙倏忽萬千里故國蒼茫隔雲水人言謫宦宜委蛇與世浮沉斯已矣公曰官無大小唯効忠彼都人士未必無英雄遂與鄒魯講仁讓詩書亦足開愚蒙一朝公去名不朽典史得公驚未有至今三百二十年尙有遺碑在人口吁嗟乎南麓書院久已荒公澤在民民弗忘何人爲立文翁廟重築當時舊講堂

江月樓懷古

蘇時學

自有藤江月先生到始知艱難方遇弟游覽尚呼兒湯餅留佳話山雲感舊詞浮金
堂下水終古現鬚眉

光華亭懷古

蘇時學

想像秦淮海高風感至今詞人空宿草江月尚浮金渺矣春前夢傷哉澤畔吟青山
賸疑冢歲歲落花深（東山有秦氏二女墓）

咏萬壽寺魚磬（刻石作鯉魚形）

赤鯉跳波長一尺不化爲龍化爲石何處漁師曾網得留向禪堂破岑寂是何虫豸
聲磬徑觸蠶猶聞風雨腥却疑漢帝開昆明當時刻石誇瓏玲鯨魚跋浪飛滄溟一
朝蛻去留其形我今攷擊憑寸椹蒲牢一吼空山青剗然震動如雷霆花間叩齒音
冷冷擊石拊石皆可聽有如仙樂陳虞廷石能聽講魚念經爲魚爲石皆神靈空門
廣大晝不扃龍蹲虎臥留門庭一聲棒喝通幽冥石幢鐙火空青燐夜夜鱗魚寒獨

醒

詠魚影石五首（在藤縣署限魚字）

蘇時學

風前鱗鬣宛將舒石果靈通畫不如留向琴堂作明鏡使君何用察淵魚
誰歟幻此鬱林石一片晶瑩玉不如天水空明鑑蒲藻凌波瞥見桃花魚
藤江青鮪石穴居石苔一色空青如登龍客見但頤朶草彈長鈇歌無魚
雪堂蘇子愛奇石東海袖中藏有餘倘令踞此學垂釣老饕更憶松江魚
片石傳來戒石如臨淵何必更躊躇願教羊續懸爲鑑藤峽風清水養魚

蔡貞女詩

蘇時學

鐔江女自蔡出字阿聰年十七頗讀書解拈筆冰雪姿蘭蕙質近闈闈住蓬華寡笑
言嫻禮律痛慈親違兩膝依兄嫂咸我嫉罪伊何勞勿恤受鞭笞更呵叱許楊氏奉
中櫛忽輸盟絕琴瑟女無言唯飲泣月重圓恐難必思古訓敢自逸女有家男有室
爲女子貴從一嗟此生何抑鬱願長齋依繡佛天高高遠難詰不如歸父母側劍江

水清徹骨石粼粼波汨汨魚鱉藏蛟龍窠女居之安且吉笑此生吾事畢歲癸卯月
壬戌庚午朔越某日半夜時貞女卒湘妃倫曹娥匹此邦人能具述我爲詩傳勿失
大白讀書巖

天上酒星謫光芒太虛魂應化爲石仙竟讀何書大夢乾坤小遺聞史傳疏桃花
一潭水風景近匡廬

藤州四賢咏

蘇時學

暇日無事偶檢傳記見邑中先賢其事有足感者爰得四人各賦五言短章以記
之蓋亦顯微闡幽之意云爾

陸蟾

先生本唐人獨抱夷齊節辟穀能忍飢何煩采薇蕨峨峨司空山高與首陽埒

先生與王元翁宏等當五季時抗志不仕後隱司空山辟穀累月乃有唐一代之

逸民也今英靈集作宋末人誤藤志作明洪武時人更誤

明教禪師契嵩

嵩公負奇志懷書走京都聲名動天子賜號居西湖老證文字禪慷慨逢歐蘇（嵩
公上書萬言賜號居靈隱同時歐蘇兩文忠皆見推重）

余孝子全

嗟嗟余孝子免親代親死手無殺賊刀埋恨重泉底母歸兒不歸何人奉甘旨

袁太司馬崇煥

書生作長城愧彼肉食相誰知袁祭忠竟負樂羊謗惜哉符鳩謠千秋共悲愴

又絕句咏陸先生蟾

先生辟穀好神仙笠澤風流未渺然老戀司空山色好棲身三十六峯巔

頌津三烈吟

蘇時學

黃懋文妻陸氏

黃懋文妻厥惟陸氏冰雪其姿日星其志猝遇強暴有死無二蕙折蘭摧璧完玉碎

夜月傷心行人墮淚時維乾隆庚戌之歲旌其門閭以風來世

黎司坤妻梁氏

邑感義鄉鄉人能說曰黎司坤有婦義烈生於梁門早嫻禮節十八于歸逾年夫沒
愍彼何辜橫遭短折慟哭憑棺肝腸寸絕視死如歸何曾示訣生既同心死當同穴
唯古丈夫有此明決一旦冰消千秋玉潔至今冢樹交柯盤結宿雨鴛鴦雌雄各別
夜夜悲鳴泉台淒咽合表行狀大書於碣陵谷可遷斯名不滅

吳斯芟妻李氏

宛彼鳴鳩在河之浹將翱將翔爰集於李李既有花李亦有子戛然長鳴棄余逝矣
賸此遺孤何怙何恃鞠育唯吾嗣續唯爾胡然皇天降災不已鳳去巢空鷓來室毀
罹此百凶欠余一死人亦有言懋勲相慰妾命如冰妾心如水卓哉首陽絕食而餓
烈女忠臣古今一軌伊人維何隴西姑姊厥家維何延陵之士谷嶺峨嶷江瀾瀾
爰作歌詩以昭彤史

題海漆花

海漆一名桃金孃一名倒捻子每歲春夏作花遍山紅艷觀者如入武陵顧前人
並無題咏補綴以詩

落霞千片萬片流水三家五家應被漁郎錯認滿山開遍桃花

鐔津咏古四首

蘇時學

甲客青蠅信不虛生無知已沒何如虞卿自具窮愁骨萬里南來好著書（吳虞翻
徒猛陵爲名士客藤之始）

石城江上石嵯峨萬古江流石不磨試向石人詢往事梁陳遺蹟渺烟波（梁陳間
置石州刺史于此）

書陳北關感君恩老戀西湖道益尊回首天南芳草綠東山何處訪沙門（明教禪
師自署藤州東山沙門）

百戰危疆倚將才潯陽江上笛聲哀孤城舊是屯兵地落日青山萬馬來（明季宣

國公焦璉嘗駐兵藤城內外)

讀王陽明集

登壇休笑弱書生試上凌烟閣上行終古名儒作名將孔明而後又陽明

按琴舫學富才博所著詩如李衛公廟壁阿芙蓉水月閣萬壽寺藤江端午詞懷

卓寬甫個陳楚三翹蘇又晴時逢朱仙槎五美皆美不勝取概從割愛其有關於

地方風景及忠孝節義可以風世者始行列入以備後之採擇

藤縣志卷之二十一

記事志總序

大凡事必求其可法言必取其有徵不可法者非有益之事不可徵者爲無稽之言此聖人所以刪書斷自唐虞而怪力亂神之無足語也第事有關於民物如水火災侵諸異皆爲可驚可畏之故不可不以時書之以紀其變蓋使觀之者考機祥而知政教之當修察變異而知人事之當謹是又於見聞筆載中寓恐懼修省之至意豈僅與街談巷說徒爲三家學究津津道之而一無可法而可徵也哉志記事

藤縣志卷之二十一

記事志

雜記

隋

文帝開皇十年番禺夷王仲宣聚衆爲亂洗夫人帥師敗之尋以裴矩巡撫諸州其蒼梧首領陳坦藤州李光略等皆來參謁還令統其部落嶺表悉定（隋書烈女洗氏傳）

陳國亡嶺南未有所附數郡共奉洗夫人號爲聖母保境安民高祖遣韋洗安撫嶺外夫人知陳已亡遣其孫魂率衆迎洗降及仲宣反諸州首領皆應之以兵圍洗洗勸兵拒之夫人遣孫暄帥兵救洗暄與逆黨陳智素友善故遲留不進夫人知之大怒執暄又遣孫盎出討佛智尅斬之進兵與鹿愿軍合共敗仲宣招撫餘

黨嶺南遂定（叅隋書）

唐

咸通三年九月嶺南西道節度使蔡京爲軍中所逐走藤州（唐書懿宗紀）

京爲政苛慘設炮烙之刑闔境怨之遂爲邕州軍士所逐奔藤詐爲敕書及攻討使
印募鄉丁及旁側土軍以攻邕州衆旣烏合動輒敗往依桂州人怨其分裂不納京
無所自容敕貶崖州司戶（通鑑）

武德初有宣撫使者至藤縣繡江艤舟遊慈聖寺以金盃挹水墜井中遂汲水乾不
見盃止得一龜長一尺二寸宣撫使命以紅帛繫其腰祝曰爾有靈吾放爾入井遂
漲金盃出水良久龜逝宣撫使沉吟而歸行至寺門見靈龜踴躍塘內頃沈不見次
日遊乾亨寺忽見金盃自澗水流拾之果昨日所失盃也遊歸復至所獲金盃處
又見靈龜腰繫紅帛浮出塘面宣撫使令人取龜祝之曰爾若有靈可同歸供養是
夜三更風浪忽起宣撫使船內有二寶劍漲水而去其龜亦不知去向明集綱戶搜
之得玉藤一根尋理藤根乃至西岸又見龜跡環繞宣撫使申奏改鸞州於此其藤

州築城仍依龜路跡且卽寶劍躍水處改爲劍江（舊府志）

宣撫使又於州南得馴鷄能言語獻之上歲餘不語上怪問之答曰身居南方生長禽中因父母異方所以不敢言上憐而放之乃賜送鷄還歸舊巢見其母已死鷄以所賜殉母身傍後人遂名此鄉曰孝義曰感義曰義昌皆因此得名

宋

淳化二年八月藤州江水大漲十餘丈入州城壞官署民田（宋史五行志）

大中祥符五年五月藤州鄧津縣蠶成繭是州不產絲此蠶食山柘而成鍼絲以獻

（通考）

皇祐四年四月庚辰廣源州蠻儂智高反陷邕州遂陷藤梧等八州五年正月宣撫使狄青將兵討之（宋史仁宗紀）

智高僭號仁惠皇帝改平啓歷赦境師宓以下皆稱中國官名是時天下久安嶺南州縣無備一旦兵起倉卒不知所爲守將多棄城遁故智高所向得志相繼破

橫翼潯梧封康端九州殺官吏甚衆所過焚掠府庫進圍廣州（宋史廣源州蠻傳）

是時樞密副使王堯臣請析宜容邕等州爲三路以融柳象隸宜州白高竇雷化鬱林義藤梧翼瓊隸容州欽廉賓橫潯貴隸邕州其三州並選武臣爲安撫都監兼知州事詔狄青詳酌施行（李燾長編）

熙甯十年初置梧稅務歲額五千貫梧州一務藤州一務容州一務（宋史）

紹興十五年詔禁騷擾韶峒瑤人（舊府志）

是年知州 重鐫唐衛國公李靖上西嶽書於石

唐李衛公布衣時上西岳書真蹟蓋厭隋亂已極負濟世之志奮欲有爲而咨之神明之辭也士重乎立志養氣衛公此書志已先定而氣蓋宇內矣是以率衆輔明主而建功業焉其書亦佳石刻在廣西藤縣麻中（楊士奇東里集） 鄭露赤雅云刻於勾漏又云真蹟用黃絹書上半元時燬於火後半餘四十字入雲鞞娘

家露言多不足據相傳此碑塌之令輒不利以是禁不敢塌惟於令交替時多具紙墨塌之雖俗忌可哂然碑賴以久存（金石略）

三十二年十二月廣西賊王宣破藤州守臣廖容棄城遁（宋史孝宗紀）

隆興二年二月癸酉復王權武義大夫命權廣西路都鈐轄專一措置盜賊三月丙午王宣等降壬子以廣西賊平詔減藤容等州雜犯死罪囚釋杖以下蠲免夏秋稅賦（宋史孝宗紀）

景炎元年元將阿里海牙破靜江遂分兵取邕潯鬱容藤梧諸州下之提刑鄧得遇聞靜江破投南流江而死（舊府志）

元

至元十六年十一月己巳梧州妖民吳法受煽惑藤州德慶等蠻爲亂獲其父誅之（元史世祖紀）

元貞元年藤邕昭賀等處蠻寇竊發以軍民官備禦不嚴撫字不至皆責而降之（

元史成宗紀)

大德十年開藤州屯田(舊府志)

泰定三年六月梧州屬縣水旱蠲其租(元史泰定帝紀)

是年八月藤州饑(元史五行志)

至正三年梧州屬青蟲食稼(元史五行志)

十四年大旱

十九年大旱(俱同上)

二十八年六月癸丑明兵取梧州藤州以及潯貴等州是月廣西諸路皆附於明(

元史惠宗紀)

明

太祖洪武元年征南將軍廖永忠叅將朱亮祖下梧州進圍藤州守城吳鏞以城降

(明志太祖紀)

先是克陳友諒命楊璟爲征南將軍周德興張彬爲副將軍率武昌荊州潭岳等衛軍由湖廣取廣西璟以兵向永州廖永忠朱亮祖旣平福州命永忠帥舟師自福州由海道取廣東仍命陸仲亨胡通治兵贛州爲犄角之勢與楊璟廖永忠兵三道水陸並進二月永忠趨廣東先以檄諭元守臣何真曉譬利害真奉表降仲亨等攻德慶有勅合兵取廣西六月永忠亮祖引兵由肇慶沂江抵梧州(史作五月己卯廖永忠下梧州)元達魯花赤拜任率官吏老迎降遂進逼藤州元尙書張翔普顏帖木兒以便宜行省事於廣西聞兵至藤州募人迎敵無有應者及藤州守臣吳鏞以城降乃率所部走鬱林亮祖勒兵追之普顏帖木兒戰沒張翔赴水死永忠亮祖駐師藤州于是潯貴等州縣以次降附永忠等遂會璟進圍靜江諸郡悉平之(舊府志)

二年并南流縣于鬱林州普甯縣於容州並藤州皆隸梧州府(明史土司傳)

八年大藤峽猺賊竊發柳州衛官軍擒捕之(明史)

大藤峽在萬山中盤礴六百里桂平大宣鄉崇姜里爲甌庭象州東鄉武宣北鄉
爲後戶藤縣五屯障其左貴縣龍山處其右

十七年大雪漫山凝結不殊北方（舊府志）

正統十一年大藤峽賊流劫鄉村巡撫萬節以聞（明史土司傳）

宣德二年初權魚商民攤等課商課魚課納銀自七年始每銀一兩納錢一百貫（
府志）

十四年初募民壯本地官司率領操練鞍馬器械悉從官給免本戶糧五石二丁事
故不得勾捕（同上）

景泰四年總督都御史王翱檄廣東僉事李觀智撫五屯龍山諸賊平之（叢載）

七年大藤峽賊糾合荔浦等處賊劫掠縣治殺擄居民命總兵柳溥勦之（明史土
司傳）

天順三年春二月大藤賊首黃牛兒攻城焚劫（舊府志）

四年八月藤縣民胡趙成因事充軍造妖言構集大藤峽等山攻陷諸縣燒劫衙門殺擄官民掠去寶家司巡司印信荼毒一方都御史葉盛督叅將范信副使雷復都指揮韓瑄督領指揮張錦王銘等官兵擒斬成等三十三名奪回印信勝從者不治
(叢載馭變)

五年韶郡縣無徵糧(舊府志)

五年十二月都督顏彪都御史葉盛討大藤峽蠻賊破之(叢載)

時廣西流賊多入廣東爲害兩鎮官不協討賊迄無成功盛至請立總鎮于梧州居中調度衆是其策而不果行不得已乃請益兵上命顏彪率兵赴之盛與彪協謀破賊砦八百所擒斬數十萬人而還(明典彙)

查得猺獞蠻賊二十年來攻破兩廣州縣二十餘處雖即退散修復軍民受害已極前年廣西攻破北流藤縣廣東流劫珠池事勢危急伏蒙欽命大將軍斬首萬餘今半年之上僅得稍甯軍民稍甦不料今秋廣西諸賊聞復大征各拋棄巢穴

流過廣東行劫與昔無異今臣等看得梧州府是兩廣交界地方北抵會城南抵交趾程各半月東抵廣東省僅途七日最爲襟喉緊要之地流賊往來必由梧州北南兩江水面偷度舊守營堡俱各廢棄以此不能守把伏乞特勅該部會議合無于梧州立爲帥府節制兩省庶得將權歸一實爲經久便益（葉盛地方疏節錄）

八年調五屯獮墾蒼梧平政鄉田（府志）

成化元年正月以都督同知趙輔爲征夷將軍充總兵官僉都御史韓雍贊理軍務討大藤峽叛蠻（明史憲宗紀）

二年大藤賊侯大狗鄭昂等攻陷藤容二縣殺藤孝子余全總督韓雍四面集兵追擒之昂伏誅（府志）

四年免鹽鈔有差被災處戶口食鹽俱免輕者減半（同上）

七年招五屯獮墾蒼梧多賢鄉田從蒼梧民黎勝景之請也獮孔潘度凡八十人撥

田糧一百五十石有奇 (蒼梧志)

二十三年瑞蓮生 (叢載)

宏治十一年夏秋大旱

十四年瑞蓮生 (省志)

十五年重修城西壽佛寺掘地得石磬魚形雕刻工緻扣之其聲清越今存萬壽準

提閣

正德十年十二月五日天鼓鳴起自東南止於西北 (叢載) (通志作成化七年)

十五年夏六月二十七夜地震

嘉靖七年九月提督尙書王守仁討八寨斷藤峽賊悉平之 (明史世宗紀)

八年尙書王守仁奏請增築五鎮城堡於五屯侍郎林富繼之詔從其議 (同上)

一增築鎮城堡于五屯臣等查勘得五屯千戶所在梧州府藤縣西北百里間其

地古名古贈正當風門佛子諸寨而與府江荔浦相通爲斷藤峽賊巢左臂洪武

八年土目覃福招集獠人八百六十四名隸桂林右衛中左所授千戶職管理其衆及後覃福既故衆多逃移死絕至成化元年僅存五十餘名都御史韓雍委官撫諭各獠多自首補伍奏設五屯千戶所衙門授正千戶李慶與土官覃仲英協同管理自後節年招諭幾至五百餘名各該監臨官員因廣西地方多事將該所土軍分調各處哨守又恐本處守備單弱乃調潮州衛旗軍前來輪戍五屯地方峻險衝要谿徑之出入多歧盜賊之聚散不測調來潮軍尤爲脆怯且不服水土不慣戰陣平居多懷土之思倉卒無激厲之勇而土人頻年聽調夷寇終身土著客主之勢既殊強弱之形遂判所以盜賊滋蔓莫能甯息也又該所舊設屯堡其地界逼窄既不足以聚衆蓄兵其牆垣卑陋又不足以示威却敵而流土官酋駢處非有將領監臨其間易至玩愒忘備猜疑起爭故新建伯王守仁議將五屯地方開拓地界增築城堡以設險而壯威取回土軍以便民而省費責成以守備指揮振理以參將兵備以附衆而講武請補原額一千名數量調兵欸數十百人

示強而備敵蓋亦察知時變備盡事宜不惜一時創造紛更之勞而欲爲地方長久安甯之計者也臣等相機允協詢謀僉同皆謂多事之地必如王守仁所處庶幾可漸無事蓋其所謀成而敵自敗城完而寇自解險設而賊自摧威振而姦自伏者類非虛語故不避煩瀆之罪爲陛下重復言之（林富事宜疏節錄）

十一年六埔思連攬佃古磊等七山壤接梧藤峯民唐宗欽等恃其險衆出劫仁封須羅等鄉督府陶諧調兵萬餘分二哨進勦賊覺先遁僅斬二百兵還（舊府志）始籍三丁（同上）

十八年總督蔡經征斷藤峽諸蠻悉平之（同上）

隆慶五年梧州屬饑（同上）

是年裁減巡司弓兵每司留五名餘銀充餉（同上）

萬歷初岑溪有潘積善者僭號平天王與六十三山六山七山獠據山爲寇居民請勦會大兵征羅旁不暇及總制凌雲翼檄以禍福積善願歸降輸賦乃貸其死且

以其子入學議者謂七山爲蒼藤信地六山爲容縣北流中衝北科爲六十三山咽
喉懷集爲賀縣諸村出入之所因立五大營設參將屯堡治焉（明史土司傳）

六年撫定九山二十八都六便那留等山獠獞悉附編民（舊府志）

十年豁無徵米自清丈後民以虛糧爲累蒼梧藤縣爲甚是年十月編審百姓赴訴
知府林喬楠爲請于上每縣減米一千四百二十三石八斗三升零皆免編（省志）
十二年正月府屬積谷各屬減半或減三分之一（舊府志）

十三年大旱蠲免災米（舊府志）

十四年七月賑梧州饑時大水城外水高一丈五尺廬舍田禾盡沒各州縣漂流民
舍俱至數百家被災田糧各數百石發穀賑之（省志）

摘丈州縣積荒地糧米各除豁有差以十二年詔再加摘丈知府林喬楠據州縣
報除豁（同上）

二十七年守道朱東光造紅站船 各二隻（舊府志）

梧州上接昭平筋竹下抵封川思浦西至平南白馬自藤江口界至北流原設哨堡歲久玩弛是年守道朱東光議設船隻委官領兵巡守(同上)

減蒼藤二縣哨江船兵時江防廳議申革每船兵五名每月省銀六十六兩有奇(同上)

二十九年六月五屯所軍民激變梧州知府凌嗣音撫之(叢載)

粵東陳一德投稅監報礦往來藤博恐嚇五屯所民派歲輸銀一百兩許其停採
監差守催民不勝忿遂激變知府凌嗣音藤縣知縣劉吳撫諭處分民心稍定稅
監悔恨掣回差官捕一德置諸法(同上)

夏四月大雨雹是歲饑(舊府志)

秋八月蒼藤博北四縣民大譟知府凌嗣音安輯之(叢載)

先是稅監增設濛江藤江戎墟三稅猾棍藉勢冒詐民情恟懼嗣音捕逐王家相等三稅亦罷(舊府志)

四十六年大旱柳慶邕潯梧藤諸郡縣民多饑死流離自鬻者無數知府陳鑑盡發倉穀平價令民糴又轉糴廣東相濟民賴全活(同上)

天啓元年八月調各縣營鎮隊兵援黔(同上)

二年大水是年革里甲雜派從蒼梧知縣梁子璠之請(省志)

崇禎六年秋大水八年夏大水十四年五月大水(省志)

國朝

順治二年蒼梧南五鄉土兵起時水師副將楊超旣反南五鄉戎墟羣不逞之徒招誘愚民瑤獠爲兵號稱義師酷索富民謂之充餉及參將陳邦傳至營取副叅遊都司剖付益肆殘暴而藤岑容諸縣土棍各集紛出劫掠民不聊生(舊府志)

五年夏大饑斗米五百錢(舊縣志)

八年閏二月梧屬各官齊至安集土民(舊府志)

十二年巡撫陳維新題免十年十一年分未完糧(同上)

康熙十三年僞總兵陳士龍等作亂陷岑溪副榜高熊徵率鄉兵擒斬之〔岑溪志〕

士龍與土賊吳鳳等攻破岑城奪縣印脅縣令孫士恂示諭士民助餉給割募兵

無賴者盡附之副榜高熊徵誓衆拒逆有領劊者共誅之復糾鄉兵斬士龍于孝

子祠鳳走義昌土寇林萬勝事聞總督金光祖遣遊擊唐鳳守備管輝領兵三百

防岑差官運餉道經義昌爲萬勝劫奪熊徵復率鄉兵與官兵合攻萬勝斬之〔

同上〕

十四年僞將孫雲客土賊吳鳳攻陷二十五都殺練總唐琛賊聲大震將襲岑溪高

熊徵復合官兵破之斬雲客首祭琛〔舊縣志〕

冬十二月貴縣土賊韋國棟自鬱林至容縣合各土鎮攻陷岑溪掠一月人畜既盡

乃出屯蒼梧界欽掠南五鄉以蒼梧練總韋必榮戒嚴不敢動遂於二十四日突至

戎墟大掠市民聞官兵追擊由藤縣大路馳去〔府志〕

十五年春僞將王邦相據藤城尋據梧城十六年秋七月巡撫傅宏烈率兵擊之邦

相棄城而走〔舊縣志〕

先是邦相敗走潯州復聚黨攻破藤縣城據之聞梧州官兵避賊聲勢委城東下

肇慶府遂入梧仍招集各土鎮分掠懷集及德慶封川等州縣

二十六年夏大風毀民舍江船〔府志〕

三十四年春正月地震夏大有年

四十六年夏大水〔同上〕

五十一年秋九月朔大風雨雪冬十一月又大風〔舊志〕

康熙間鄉民失鷄疑爲鄰婦所攘疾聲詈罵語侵鄰婦婦念自縊越數年民偶過荒
落見野蠶吐絲樹間欲往取之忽見鄰婦馳來罵曰汝何盜吾繭民驚懼仆地少頃
甦歸使人禳之則鄰婦所埋處也越數日死〔舊府志〕

雍正四年夏饑

六年冬十二月大雪

七 年大有年冬十一月大風拔木

乾隆三年歲大熟

七年饑

十二年秋大熟

十九年大有年

二十二年大旱

三十一年行院村祝姓家牝牛產一犢旋生五角里人咸以爲異

三十三年春三月大霧夏五月大水冬十二月大雪是歲米貴

四十二年三江里農人袁汝清當冬日晡之候驅牛犁田忽田傍叢草突出一虎直前脚清清正在危急牛忽掣斷繩索遽前觸虎虎乃舍人向牛牛觸益勇虎遂奔牛猶逐虎里許牛回虎亦旋回牛復逐虎數四近人聞牛吼聲因跡往見清被傷遂告伊家負之歸移時牛亦自返至門見清血跡且喘且嗅望見清喘吼交至如慰問

痛苦之狀清後以調治得不死越數年牛老斃清葬之於獅子山負土成墳觀者咸以爲義牛塚云

四十九年大水平地水深三丈壞民舍無數

五十一年大旱

五十二年大饑斗米六百錢

五十九年大水平地水深二丈

嘉慶二年二十五都祝村民掘地獲一銅鼓高可一宣週二柯有奇面徑一短上刻四蛙細紋工緻扣之聲若洪鐘鄉人異之獻諸本都總廟觀者或以爲馬伏波遺器九年二月雷震魁星閣

嘉慶十年隨化里黃坡村民掘地得銅鼓權之重百餘觔其式樣與祝村所獲者同十二年粵東巨盜廖世滔廖世靈等潛逃至二十都石村旬日間糾集匪黨多人營立寨柵遠近悚懼知縣陳廷璠聞風卽率寶家司巡檢謝朝璋葉秀華親督民壯弓

兵協同鄉民迅速擒之焚其巢餘黨潰散

十四年春魁星閣火

十五年三月朔雨雹如鷄子大壞廬舍樹木禾稼

十六年八月彗星見於西方

十八年春正月初四地震

五月義昌水漲民居多被淹沒一望瀰漫越數日水退自歐村以至東岸洞中禾稻忽現一大路約三尺許高懸露有爪痕觀者以爲神龍所過或亦不誣

六月雷震魁星閣

十九年三十九都高垠村農人操耒具有事于南畝日午羣集垌中天色清明衆方俯首芟柞忽昏暗若暮夜衆咸驚異企立盼望觀面各不相見頃之光開一線仰見黑氣瀰漫從空冉冉而散日復晴霽如前俯視田中頓開三穴以石投之其深無際一穴水黑其味腥一穴水白其味甘一穴水清飲之可以療疾里人爭汲絡繹不絕

越年餘泥淤而黑白各水至今猶有藏者

七月初六日天鼓鳴

冬大雪

二十一年正月元旦日龍塘灣湧浪高數丈

二十一年二月三眼堡義塚產異草如靈芝狀義塚乃乾隆間二十五都處士鍾振揚之所築也彼地舊有無主枯骸一百數十餘具橫溢山下白骨飄零每遇苦雨淒風隱隱如聞號泣揚過此一望漚然亟捐資荷鍤以掩之爨爲一墳是夕夢百餘人入室致謝皆裸體且以寒告揚異之翌日剪紙作衣履冠冕形焚于墓左黃昏就寢後彷彿見前所夢者皆弁帶奇偉向前拱揖揚驚起呼之寂然遠近聞者傳以爲異洎乎著雍敦牂之歲揚孫復行重修掃其墓以光先人陰德今塚上產異草豈墓中有奇士沉淪鬱蒸莫遏如歐陽永叔所謂產靈而九莖者歟

祥瑞

卷之二一 雜記

(九百四九)

道光元年辛巳歲大熟 二年壬午年大有

十二年壬辰歲大有

十五年乙未冬十二月十六夜天降大雪平地深尺許屋舍山場一派如棉銀鋪玉

堆越日未消八旬老人未曾見及蝗蟲遂 沒年豐稔誠是瑞雪兆豐年

咸豐二年冬三月春北江之水由城東倒流西城外靈公廟復繞流出大江是歲癸丑縣

再開甲榜

同治元年冬三年春此水倒流亦如前是歲癸亥

思科縣三開甲榜科名之驗信然

道光十八年戊戌七月二十日卓佃母伍氏九十壽早辰烏燕數百集屋脊呢喃數時始

散亦瑞事也傑佃皆有詩以紀之

三十年庚戌冬有白燕一雙至待村數月乃去

同治四年乙丑歲饑

五年丙寅年大有

六年丁卯歲大熟

七年戊辰早稻大熟

災異

嘉慶十五年庚午彗星見於西北方

二十二年丁丑夏六月大水平地水深二丈餘民舍禾稼多淹壞 八月旱

二十三年饑

二十五年庚辰夏大旱栽種甚少

道光五年乙酉彗星見於南方

七年丁亥秋七月大風禾木多擢

八年戊子九年己丑連歲大旱荒歉

十年庚寅大旱歲凶

十一年辛卯春夏又大旱民饑死無算知縣邱登倡捐平糶併設粥廠以食饑者

十三年癸巳夏五月大水 秋七月又大水均平地水深二丈餘淹民舍田禾無數

十四年甲午六月大水秋七月天大水災與十三年同秋八月蝗蟲陡起飛則遮天

蔽日止則遍野漫山所到之境禾稼青草樹木耗食殆盡

十五年乙未夏六月蝗蟲又起害稼署縣陸恩燾捐俸設局收之 冬十二月大雨

雪平地深尺許蝗一夕死盡

十七年丁酉春三月朔夜雨雹大者重數斤打壞屋舍秧苗無數 秋七月又大水

與十四年同

二十年六月十二大風竹木多擡吹壞屋舍無數

二十四年甲辰夏七月大水過於十三年數尺

二十八年戊申七月初一戌時地震

二十九年巳酉豹入城

三十年庚戌雷震太平墟岑嶺文塔壞魁星像

正月初一日日食

冬十二月地震

咸豐元年辛亥夏南門外蘇園李樹結實如瓜嗣後東逆任文炳陡起城中人多離家自

此始

二年八月彗尾見

四年甲寅夏六月雷震南砲臺 秋八月十二日城陷

六年丙辰春二月地震有聲

七年丁巳夏四五月大饑斗米千錢民食山茹草蕨死者無數携子女投生變賣易

食者甚衆 秋梧州糧盡城陷

八年戊午彗星見于西方時八月初旬

是年春太平至三江河水自相沖激撼岸震船人以爲水鬪夏匪首曾三陷太平墟

擾害甚慘

十年庚申正月初三日地震秋八月陳開卓八陷座洞村堡殺二百餘人

藤縣志卷之二十一

兵防

道光二十一年暎夷入叛粵東海疆告警梁中丞章鉅駐梧州官兵經藤者絡繹不絕

三十年勞中丞崇光駐節梧州以東匪入寇故也

咸豐元年夏六月徐宮保廣縉駐節梧州以艇匪大頭羊滋擾河道冬十二月東匪任文

炳入境

二年春正月知縣張鵬萬招募壯勇二百名防禦縣城並調集西隅廂一都二都三都七都八都十都十五都十八都三十一都四十一都練勇三千餘分紮縣城內外
二月初旬任文炳焚劫城外城內防堵有備無患

三月中旬道憲楊彤如明參將督師駐縣城南門內外守備徐紹烈候補縣張鳴鳳

管帶全州兵勇駐藤州書院

委員聞勳管帶聞勇駐城東門外

夏六月任文炳艇逆經徐官保率師攻擊全股殲滅各官軍撤去

四年秋八月縣城失陷冬十月二十三日張觀察敬修派撥水陸大軍克復城池獲逆黨三百餘名立行正法

冬十一月初四日代理縣雷葆初蒞任調集各都里練勇叁千餘名駐城守禦

五年四月初八日東逆李文茂率黨船千餘隻揚帆直上縣城又陷五月初四張觀察敬修親督水師由梧赴藤克復城池該逆上竄駐師東門外河干數日撤去

十一年夏五月蔣統憲益禮親督水陸大軍由梧直上復縣城撥都司胡益志管帶上字左營道勇駐城背鷄谷山頂以防自良金鷄一帶土逆總兵李派撥大拖

罟船捌號防堵城東江口秋七月至同治四年底止城鄉團練總局胡毓璠霍康海莫本培朱五美蘇泰復歐華麟蘇啓禧蘇百朋周善相等招募練勇二百名巡船二

隻防禦縣城內外

同治元年春正月都司何元鳳管帶恩勇一營駐城背雞谷頂裡山夏六月撤知府趙元

模派把總謝蘭和管帶端勇二百名駐東門外

二月叅將利輝撥把總梁光管帶三板扒船九隻駐防城東江口

二年夏四月知府趙元模派撥把總羅保邱取全帶潮勇二百名駐城背雞谷山頂

把總盧勝接管三板扒船九隻駐防城東江口添撥都司李開學管上字中營道勇

駐雞谷裡山都司胡高志接管上字左營道勇駐雞谷山頂冬十一月移駐二都富

安村村十五都疊桐村下八都古祀村剿辦土匪攻克金板坦潘三逆巢都司王珍

慶管帶上字前營道勇駐九都古另協剿金板坦潘三逆巢

署梧州協副將全州營參將兼管上字中營道勇唐元芳撫大案股匪十二月駐城

東江口剿撫各處土匪

三年甲子夏五月蔣統憲澤春派撥都司黃萬勝管帶南勇一營駐城南門外觀音

痛背山並派都司周開泰管帶南勇一營駐金雞虎跳冬陸亞崩七據公扶張廷稀
據糯峒知縣邊其晉派覃乃輔等擊散陸七衆又招勇練擊散張廷稀衆
四年春三月派撥參將胡高志黃才貴各帶道勇駐金雞以上一帶剿辦覃瑞珍陸
七等逆

四年乙丑秋七月吳統憲觀察光春撥派都司翁長春管帶副前營南勇駐縣屬各
都里查辦善後五年丙寅九月平定撤去

冬十月知府劉楚英委知縣邊其晉府經柯益千總杜遇琳攻克三吉寨

六年丁卯夏四月知府劉楚英委知縣邊其晉並派撥參將胡高志管帶上字左營
道勇駐糯峒攻克溫自振逆砦擒溫逆斬之八月撤

春三月知府劉楚英派撥候補經歷柯益管帶潮勇二百名會同千總毛鳳鳴駐縣
屬太平墟剿辦大案狼虎等處逆巢擒逆首莫十三斬之

七年戊辰正月知縣邊其晉督帶兵勇團練擒大逆斬吳若瑞並破其砦

五月初九日攝梧州府觀察凌昆統水陸兵勇及知縣邊其晉攻克永安州之南蛇砦

兵事誌略

道光二十五年土匪首鄧立奇倡亂自稱平地王鍾敏和自稱高山王在赤水墟各豎旗聚黨劫掠蒼藤河面往來船隻始而乘夜截槍繼而白晝橫行以後賊風日甚一日官兵不能擒制土匪因之蠱起咸豐年間地方糜爛禍實基此

正月廣東賊劫七都莫祖培家回至西甯縣被詰擒賊二十餘名以獻

二十六年秋八月初二日賊首吳英康亞鏡劫三十四都金鷄市署縣候補同知劉繼祖集衆掩擊之擒獲數十名餘黨竄逸

時有賊勇力絕人當劫掠時或縱火焚街急挈水兩器飛上屋簷以救俄而追者雲集圍之數重始就縛尙從容談笑了無怖態謂若等不縱我乎竦身一掙繩索立斷劉公命極殺之

二十九年土匪首鍾敏和踞下八都古祀山爲寇聞官兵往捕而遁
三十年六月土匪何洪錦黃亞益黃再一木壽劫掠大任上里木河村廊府村存村
等處

土匪首唐汝中焚劫大任上里高田村及太平隨化里各村署縣陳寶與城守營千
總鄧紹邦率兵往捕賊突至紹邦遇害練長石奇寶集團剿捕汝中伏誅

八月艇匪大頭羊劫濠江墟焚當舖

土匪何洪錦戴九李四陳超瑞等擾三江里太平墟踞大黎里古制村勾連大黃江
巨匪大頭羊大鯉魚等艇匪其勢愈張

九月下八都團長施及道十都團長歐華國會集團練協同千總黃錦標圍擒匪首
鄧立奇於十都之均平嶺解梧郡行營正法勞中丞崇光湯太守俊各賞賚有差
是歲粵寇所在盪起湯太守俊如藤勾當中途遇警急棄船而奔倉卒覓肩輿不得
則以新人轎舁之漏下三鼓抵藤署衆莫知爲太守來也已而候補府劉繼祖奉檄

招撫賊益無忌憚劫掠紛然尤以擄人爲急時在籍同知何宏元被擄索至數千金

廼釋

咸豐元年辛亥秋八月潯州金田賊自平南竄永安經楊峒里鄉人集衆拒之

二年壬子正月十四日廣東水賊任文炳西南長關巨關福劫縣城南門外蘇家署縣張鵬萬疾其捐輸不力禁城中兵練不許開砲任賊搜括地窖藏金三日夜滿載下戎墟招黨賊勢大振復下攻梧州

二月賊復自梧西上時官軍數千邀擊於藤弗克遂上竄濠江墟各處沿江劫掠攻平南城旬日未拔竄擾潯州勒令打單掠貴縣發藏金滿載東歸時六月徐宮保廣緝兵駐梧州賊自上游竄下官軍逆擊大敗之盡殲其衆

八月安城墟團長黃惠昭弋獲西南長解赴徐宮保行營正法

艇匪復來攻縣城被團練擊却之

是年捲嘴狗大里魚在梧州河面劫掠

前歲臘月賊自東省揚帆西上黨猶未盛既劫掠藤梧即欲飽颺而散二月下至賀江口爲官軍所敗始惶懼不敢東歸並招集徒衆一時烏合聚至數千遂溯流直上逼擾平南潯州貴縣三年癸丑九月平南大坡逆首覃亞兒晚劫掠羅平村十月劫思盧村

蒼梧逆首莫石戊三蟲四等劫十都三吉垣村各團聞警乘夜追擊團丁李瀨殲焉十二月容縣自良賊踞老鴉塘時有客艘數百沿繡江下賊尾而劫之遂踞老鴉塘窺伺藤縣是歲知縣翟登峨蒞任前候補府劉繼祖留辦賊務

四年甲寅正月二十四日蒼梧新利墟匪首張華洸六蟲四莫石戊邀同西甯勝洲墟匪首梁爛脚安龍娼七大口娼等犯垣南村諸生歐華國歐華麟等督團擊潰殺賊百有餘名奪獲旗幟炮械無算自此十都與蒼匪遂成仇敵逐年防堵迄無甯日龍屋山麓屋雲泉居士有正月廿四紀事詩云天地之大德曰生天之所誅惡必盈兇若未窮惡未極蚩尤未必附一坑君不見十都八都團練殺大賊雖協羣心與羣

力若非彼蒼有意除螟蛉何以禽獮草薙一朝殛請君聽我說其詳桑梓由來近互鄉彼都人士狐裘黃虎而冠者甘豺狼黃巾張角來煽惑尤來大槍集狐馘闕黨童子也綠林齊人妻妾學貳側攻先所難擊劍門餘同破竹勢易吞狝狝跳梁若獍狗左衝右突類奔豚火箭火毬夾鎗砲頃刻煙迷杏花村空中一聲飛霹靂賊奴賊魁合蕩析鷗自投羅丸爭彈豕既入笠任屠剔傑魁圍堦躍登樓一箭雙鴈貫其喉雙戟前驅者與霸用矛踰溝有冉求甯季狡狴呼契弟一聲飛丸碎其體愕訝苞苴不能通狂喊犬導武鑿昧轟雷虡虎團胆雄捲霧驅風團力齊紛紛昏奔鳥獸散鋒甲戈矛委塗炭四壁又來生力團沿途堵織多糜爛馬陵道上截其奔虞詔書生畧不羣兀虎計燧黃天蕩黃巢命殞烏鴉軍此時團勇勢如風此際團長氣如虹倒戈讎鼠亦逐北三千組練爭向東旗角影翻楊柳綠血光洒遍杜鵑紅電掣騰馳到鴻溝征夫個個勒馬頭寇莫追窮志所戒停鞭且聽中權謀一騎西來傳團令振旅而還暇且整寇則擊之逸待勞服則綏之寬濟猛彼縱壺漿篋食迎我師不如使渠條分

縷晰各自治非種必鋤凜

王法雖有支蔓從何滋是可知

天子神武威風及海隅婦孺亦解談兵靖萑苻何莫非福善禍淫理不爽窮兇極惡遭天誅

二月十四日徐八劫十都旺長村被練擊潰斬賊首徐八殲其黨十餘名

自良賊屢爲藤患衆村密議擊賊賊偵知之遂夜遁衆追至黃沙不及而還

三月陳孟德陷橫臺堡

前候補府劉繼祖誅賊內應

時衙役久與賊通而坐享其利每官遣偵賊輒張皇聲勢以恐嚇之令憚懼者每爲所制莫敢誰何劉公素稔其惡佯爲不知而陰召瀨勇守城部署定急閉門搜捕籍其尤無狀者捉獲徐晚亞孔叔姪曹勝彪總頭按名誅之餘黨竄逸四月逆首何先拔何先體自號武威大將軍劫掠泰平墟及三江里十二日攻陷丁田堡十七日大

坡自良各股匪攻陷腰古高田各村大肆殺戮

閏七月初五日艇匪梁培友等攻梧州城

自良賊擾十八都署縣翟登峨城守劉松芳率兵壯往擊不克而還

八月逆首何先拔勾連吳酉元陳超瑞等豎旗梁培友攻梧州城不克分其黨上攻藤縣自良賊首馮六土匪首猪籠二等應之十一日縣城陷前候補府劉繼祖在大街公卒舖殉難典史冉正棠與其妻孫氏幼孩皆死之知縣翟登峨被執城中死者六七百人自良賊遂踞縣城馮六僞稱大都督猪籠二僞稱都尉

十九日土匪周水劫十都州村聚眾孔凹埔垠南諸生歐華國歐華麟集團攻擊焚其巢奪獲所擄人物以還

九月初六日土匪猪籠二踞沙黃劫掠十都各村歐華國歐華麟集團擊潰生擒二十餘名殺僞軍師革生李蒼吉並餘黨壹百二十餘名首匪猪籠大纛斃在內奪獲炮械旗幟無算

十月各都里合謀復城

梧州圍解二十三日城守劉松芳率官兵協練恢復縣城逆首馮六遁回自涼（二十九日擒霍本昭送府殺之）十一月自涼賊復來滋擾距城十里許城守劉松芳率衆往擊賊遁迨至三十二都富喇而還大坡逆首覃亞稅陷二十九都大澤甲古對村蒼梧逆首張華洸陷富雙村

十二月義昌江賊擾十五都各村城守劉松芳率衆往擊賊遁

五年乙卯正月初十日自涼賊突至知城中有備而去和平局團練堵剿張高友股匪傷斃練丁十餘名二月署縣雷葆初率團練征自涼賊至竇家寨不克而還

前知縣翟登峨遇害於肇慶

時賊踞肇慶東省水師堵禦嚴緊不能下竄張觀察敬修駐封川上下夾擊賊勢窮蹙有逃自賊中者據說翟公見賊糧竭將成擒因暗繪其狀約官兵盡力攻擊可獲全勝中途敗露賊獲其書遂殺翟公

四月大坡自涼股匪踞高田村

初七日艇匪李文茂等被東省官兵擊敗率其匪艇二千餘艘夥黨四萬餘西竄至藤踞縣城搬運倉穀未幾逸去上踞大黃江遂圍潯州

五月艇匪李魚兒等在白沙江焚劫

初八日艇匪陷上垌村

七月首匪陳昭瑞莫昌文何先拔等踞石山岑嶺各團合擊大敗之羣匪上竄陷思排村二十一日夜半大坡賊襲破思慮村

八月永安賊劫岑婆寨

大坡自良賊焚劫三十三十四各都感義鄉團練圍而殲之於高田村

是月賊陷潯州

九月諸生楊際春集衆攻自涼賊巢被執死之

十一月初五日自良大坡股匪掠陳村

六年丙辰正月大案匪首許多良坡頭匪首何光拔劫掠大任里高田村

樟村土匪劫上風門村

艇匪大口河焚劫大橋壩

二月二十七日大坡賊陷旭壩村

賊自潯突至焚衙署取魚影石以去領兵蘇海以水師敗績於藤

潯州賊焚訪蘇亭縣官退駐富安

大坡賊焚燕塘村

七月土匪莫四猪籠二何本生焚劫四培河各村

北岸各團合攻坡頭賊巢敗績

八月羅城各團合擊四羅江佛堂山馬黃葉掘羅雲各股匪於三十二都之高田村

斃賊黨六十四名生擒十五名自涼大坡各股匪攻陷羅密村及厦安民堡

十月初八日平南匪首曾三潯州逆首陳開土匪東江五何先拔等踞秦平墟其二

江里東皇里各村均遭焚劫

十一月廣東賊區應突至三江里龔泰平墟踞之鄉人集衆邀擊焚其所居廬舍殲賊數百名

七年丁巳正月元旦蒼梧新利匪首張華沈六突至義昌鄉太平坡陳宅踞之
大案匪首許多良等立稅廠於府河官兵擊走之

坡頭逆首何先拔僞稱天王何逸何中孚僞稱軍師陳孟德覃禮和何先詳吳上車
六吳西廖順安僞稱都督分踞滿村下六石人寨金屯山軍場狼旅等處勾連永安
逆首張高友大案逆首古今四艇匪李茂酷勒地方上糧

二月初六日糯米九股匪陷屋蒙村十都各團合攻之賊敗走

四月十一日大坡馬黃股匪陷里村

二十日平南匪首曾二劫掠羅籠里和平局集練堵禦未幾賊遁

二十五日土匪卓八平南匪首曾三勾通艇匪攻劫南股務倫村堡

二十七日坡頭土匪何先拔陳孟德等陷安垌村

二十八日陳孟德攻都鴉嶺

五月初七日陳孟德陷山琶村十四日踞岑村堡

十五日踞潯逆首李文茂率匪艇千餘艘自潯下踞縣城

二十四日平南匪首曾三踞泰平墟陷浪寮中車羅壳洲等村十七日陷山口瓦窰

下寨下黎大窰橫橋各村堡

二十九日艇匪李文茂率黨攻陷新車塘盤石堡殉難遇害者四百九十餘人

五月艇匪入犯五屯江被團練擊却

閏五月初七日艇匪圍梧州

初十日匪首范十四糴米九梁竇四突至開來村入之各村赴援不克十都團長候

選從九歐寅時軍功六品歐熊時七都團長候選州同莫遇培被擄不屈佯僞以死

賊遂拒開來不去焚劫附近數十村

自涼賊破都萌村監生容有莊死之

七月初四日潯州艇逆踞平南丹竹墟和平興義團助川四里防剿大獲勝仗

十四日艇匪擾羅龍里各村至八月初旬始退竄去

賊久圍梧州自六月至八月城中糧盡煮皮革草木以食饑死者數萬人並堅守無叛去者藤縣義勇何信之及降賊鍾敏和並運糧至梧弗克達何被執死鍾退踞山寨賊圍而殺之

八月十一日賊陷梧州城學使沈炳垣副將蔣福長死之紳民從死者無算賊遂踞梧州逆首李文茂僞稱太平王阿黎潤僞稱平西王陳開僞稱鎮南王梁培友僞稱平東王大口猖僞稱定北王

九月平南大坡逆首黃大蒼梧湏羅鄉逆首張華沈六攻陷十六垌羅文洲都蒙村老竇家寨大化村三十都三十一都一帶地方焚劫殆遍十一月踞梧賊下犯祿步官軍逆擊敗之

十一月十三十四兩日賊燒藤縣署盡焚之

大坡自涼各股匪攻擾十八都羅城峒各村

初八日艇匪焚劫安平河陷沙峒村

十八日大坡自涼股匪攻陷羅平村

廿八日陳孟德陷大寺營

二十九日陷冷水堡殉難遇害者甚衆

十二月土匪周水焚劫九都孔良村被團練擊敗殲賊數十名

八年戊午正月初十日富峒石壩股匪焚劫大英嶺

二月十四日蓮塘賊首張高友劫掠泰平墟六峒及大任里裡山各村

二十日艇匪藤包麻率艇五十餘艘劫五屯江各處被團練擊退

二十一日許多良劫那安古篤各村

三月十七日大坡股匪攻藤底村

二十五日陷夾持各村

四月崑提軍壽大破賊於封川賊西竄棄梧州而去

十七日官軍復梧州遂復藤

二十三日黃大燒狗股匪焚劫古旦村

五月張高友股匪踞平村

八月潯匪下擾藤縣由濠江墟入和平墟被團練擊退

九月由十二基入劫雙村被團練擊退

二十日大坡股匪攻大涌堡

九年己未二月土匪黃啓琛等勾連大坡濠五陷羅埗各堡

三月二十四日踞潯逆匪自潯東下犯梧州不克退回藤縣僞先鋒大口炮率黨七千餘人攻二都富安村破之屠戮男婦五千餘人被虜者伍百餘人時縣城殘燬已甚賊不守而去其賊目杜枝譚震陳在江口設立稅廠猪籠二鬼鼠零黃仕成在老

鴨塘設立稅廠是日大坡首匪覃亞稅率黨千餘攻陷三十八都三月初十日陷黃
鑿村三十三日陷橋頭寨殺戮男婦貳百餘人被擄者數十人

二十七日黃大覃亞稅攻獨州營

四月潯匪由白馬墟入馬塘初四日團練擊之失利初五日賊敗走

二十日陷枕頭營陳村堡

二十八日陷泗河村大坪嶺

五月蒼梧賊陷十都界垌村

六月陷十五都大梳巖

坡頭何先拔陷古思堡

八月潯匪入羅龍垌被團練擊却

大案匪首許多良陷古集鹿塘各村

十八月大坡賊攻上垌村

二十八日蒼梧新利墟匪首莫石戊邀同逆首戴九陷十都孔廩村踞楊村願龍觀連陷恩門白土等村越日被團練擊敗之

九月許多良古今四等陷上峽村

潯匪由屯江入和平墟被團練擊却之

初十日大坡賊劫掠羅平村

十月十一日蒼邑新利墟逆首莫石戊三莫天養六張華洸六聶四邀同平南大坡逆首覃亞稅黃大糯峒逆首戴九攻十都楊村至十一月二十三日夜陷之團長陳華圖遇害男婦被殺者二百餘人被擄者二百餘人連陷平城屋蒙外寨二十餘村大坡股匪攻陷四十三都上洞公局團長鄧肇基遇害

金田賊數萬自湖南竄回廣西擾藤縣泰平和平各處村莊及隨化里均遭劫掠

十二月初四日土匪周七陞區韶區英區毓珍勾引著梧須羅逆首莫石戊平南大坡逆首覃亞稅糯峒墟逆首戴九陷十都垠南及蓋村寺面藍村州村瀧面大范等

大小數十村

初七日十都團長歐令復陳允中督練五十餘人擬守玉泉寺圍復各村被賊圍困俱遇害自是縣屬東西兩岸皆賊藪矣

十年庚申正月十六日團練克復十都楊村莫石戍逼令各處從逆村民圍困練丁陳煥歐毓瀛等五十餘人盡遭屠戮

三月署縣宋尙述往三江里礮底捕賊土逆鄧作曾秀才朱屎湯六等戮殺之宋公遂殉難張華洗六焚劫九都柳浪村陷待村

七月十三日潯匪由白馬墟入攻和平墟被團練擊却

十六日失利羅龍里多遭焚劫

二十三日攻陷田寮村等處

八月初九日土匪卓八勾通艇逆陳開攻陷三江里座垌屠戮甚慘知名者四百餘人署縣陳延齡勘驗合埋一塚

土匪朱屎湯六劫掠楊响里石脚村并平團集練擊退

蒼梧賊轟四圍攻峽村被團練擊却

十月初十日東匪陳金剛被官兵擊敗率其黨數萬西竄攻陷逢軍山至仁和墟渡

江過藤地遂擾岑溪

九月十八日大坡逆首覃亞稅破楊威營

十月二十六日土匪李斌周七陞區沛義區毓珍莫懿純李佑社等復攻峽村被團

練擊退

是歲蔣統領益禮平蒼梧下郢城賊巢賊首羅華觀竄逸至藤遂走潯州

十月二十六日賊攻社鬪岩死者百餘人

十一年辛酉正月初十日艇匪陷潯州(二十日入平南)

十八日下郢逆首羅華觀率黨數千復自潯突至櫻泰平墟距楊响里中車署縣陳

延齡會同委員候補府蔣本蓉大軍擊敗之賊遁

三月二十一日潯匪踞羅龍里和平墟土匪卓八踞三江里座峒村

二十九日馬黃股匪陷十字嘴村

四月初六日張華洗股匪破十都沙黃村豬籠二陷大橋村

初七日羅華觀劫距楊峒里中車坳分黨焚劫羅壳等村

二十一日潯匪陷羅龍里練村堡

五月十五日大案股匪攻陷思員村

許廷瓚股匪陷楊峒里古篤村堡

蔣統領委員候補府蔣本蓉親帶湘勇五千攻破坡頭賊寨賊首何先拔退踞金屯

山 六月初四蔣統憲益澧水陸大軍自梧上復縣城

北流江口賊稅廠退入虎跳與土匪開設分東西關取稅

初六日立城鄉團練總局

七月官軍克復潯州

義冒賊踞思旺復擾孝義仁封各鄉

署縣陳延齡撫楊峒里賊

九月初七日土匪朱屎湯六焚劫黎竹村

坡頭土匪何先拔劫掠楊峒道姑村梁容賢等十三家俱被害

十一月土匪卓八劉成昌攻劫十里村

大坡自涼股匪破社峒獺背各村及三峽營古齊塘

各兵練困逆首何先拔於滿村破坡頭賊巢何逆兄弟姪等俱伏誅

何逆夥黨蘇元章襲陷陳村屠戮七十餘人逆勢復振

二十九日大坡賊攻陷四十三都冷水村堡

十二月大坡賊首黃大破中八都蒙登村屠之遂掠沙田

同治元年壬戌二月坡頭股匪何志宏劫掠富樂埔金屯山股匪成亞五劫掠六埔口

三月二十七日陳孟德股匪劫掠楊峒里上風門村

賊自老鴉塘突至劫城鄉總局衆兵練夾擊賊敗走

夏鬼鼠零黃仕成投誠

坡頭逆首何先拔勾通蓮塘蘇元章股匪陷北岸各村堡擄殺二百餘人

秋朱五美等保結何先拔投誠既而復叛

二年癸亥春御署縣陳延齡督帶道勇征大案古今四股匪

官軍復容縣擒范亞音誅之

夏署縣張葆光協同都司李開學駐泰平墟剿辦大案賊

秋候補道蔣澤春撫竇家寨逆首覃亞稅改名乃輔

糯峒逆首戴九改名國恩金雞虎跳逆首豬籠二改名賴德何木生改名世型黃金

龍改名錦榮唐九改名文蔭吳亞妹二改名若瑞俱就撫十月局紳商同署縣景星

稟請大兵乘機恢復地方

十一月署梧州協唐元芳管帶水師利輝管帶上字左營道勇胡高志等到縣駐紮

招各都從逆者俱薙髮歸團

署縣景星署協唐元芳撫大案賊既而復叛

十二月唐元芳兵駐七都森村議撫八都金板坦潘三股匪說之二旬有餘不果二
十七日胡高志由古祀移營往樸之潘三立繳大砲願投誠隨卽遣散黨羽毀其巢
三年甲子春候補知府榮林候補分府陸晟祖辦蒼藤善後令各團寨及賊寨砲樓
盡拆不果行然賊勢自此斂跡亦自此漸就誅滅矣

八月蒼梧匪首聶四犯上八都黃板村被練擊退

九月復來又被練擊退

冬賊首張廷喜招人當勇給予旗幟號衣遂糾黨數百扯官兵旗號由大坡入縣境
踞糯峒墟復叛沿途經過莫有疑其爲賊也十月知縣邊其晉協練往擊至三眼堡
而回

十二月知縣邊其晉集練協同各紳團堅壁清野賊無所掠遂合擊破之賊敗遁去

後被潯州府桂平縣擒斬

土匪陸亞廟七覃瑞珍作亂擾二十四都各村知縣邊其晉集練並各紳及首民覃乃輔擊敗之賊遁後被擒斬

四年乙丑二月十五日黎明時分莫石戊等率黨千餘襲垠南村被團練擊退遂劫孔聘村勇練擊走之

閏五月翁都司長春誘擒逆首霍十八霍六元馮西山等十名解省正法

秋土匪黃六兒李長復叛嘯聚鳴舌嗜城鄉總局練勇襲擊之焚其巢窟賊十數名餘黨潰散匪首陸成志岑瓊言復叛聚黨富洞村署縣唐鳳翔都司翁長春協練攻擊誘殺之殲黨數十名

九月唐鳳翔翁長春移營二眼堡

十月唐鳳翔翁長春督兵練入糯峒各首民繳大砲

十一月二十二日攻剿開塘甘永瑛巢穴平之

十二月初十日攻剿大塘村鄧作英巢穴賊遁去

是年覃亞稅猪籠二被人殺死

平毀糯峒墟逆首戴九老巢徙其眷屬

五年丙寅正月翁長春移營上八都洗村並分紮十都限南村

二月署縣唐鳳翔入垠南查點甲册殺匪首莫秉岳周合利七令各牌長具結

三月五屯江七里逆首江六聚衆作亂踞三吉寨並分黨劫和平墟署縣唐鳳翔都

司翁長春梧州協左營都司劉松芳剿平之獲江六軍前正法

九月黃卷成江三千傍等復陷三吉寨

十月二十二日夜冒大風雨知縣邊其晉帶勇練協同管帶潮勇府經歷柯益白馬

汛千總杜遇琳攻復三吉寨黃卷成等匪遁去

六年丁卯二月知縣邊其晉帶勇練協同叅將胡高志攻剿二十二都匪首溫自振

賊寨

四月二十七日攻破溫逆剩表寒溫自振伏誅梁汝弼等拏獲首匪倪啓理解府正法

四月管帶潮勇府經歷柯益城守千總毛鳳鳴攻破狼虎寨擒獲首匪莫十三許大鍾解府正法

五月韋錫年韋品良黃斗光及勇練拏獲首逆黃卷成九月李應龍江純龍江觀龍拏獲首逆江三千傍並先後解府正法

十月知縣邊其晉協同團紳王家宰取復寶家大砦交還楊上璉等仍管舊業覃乃秦徙去

七年戊辰正月知縣邊其晉督同團紳胡毓璜胡紹麟鍾躍龍等剿辦逆匪吳若瑞攻破其砦擒斬之

自咸豐三年至同治四年迭被坡匪艇逆前後攻陷四十三都思慮冷水平羅上坵大插檣埔藤底籐竹大帽小帽十村營堡陣亡殉難男婦三百三十一人（現入縣

昭忠祠)均經圍長鄧肇基何信之劉志遙何安之劉樹昂何謙光韋世居吳建和謝元芝等率上桐團三十五村練勇及平南衛安團與二十九都四十二都練勇擊退殺一百十八名

青山堡在三十九都情口村控洞頭高榔二莊因古砦形勢而築之咸豐元年郡廩生林寶揚生員羅崇光廩生李耀壽等築城之時劇賊覃亞稅蒙祖瑜王佐才大匪馮六等陷藤城寶揚等往救不利都司劉松芳復增築砦牆覃亞稅王達廷屢攻此砦皆被挫敗遁去

瑞獅營在四十一都思崖村形勢峻險四圍石壁數百丈如獅子之狀中有一徑可通往來山頂地勢平坦分兩階下階有塘泉水湧出能濟數百人傍有石塘二兩山俱險峻其塘如峽巷任便取水上營咸豐四年十一月內所築也董其事者唐就元文廣模黃鳳齡唐本盈黃啟寬諸人集烟戶千餘家防守力禦土匪艇匪屢攻不克賴以全活者數千人迄今基址依然砦中人皆能踴躍防禦卒保無虞雖藉天險之

設抑亦人力之可恃者也

七年四月初四日匪首李社保據永安州南蛇覃殿元之砦攝梧州府知府凌昆知縣邊其晉招勇協同水陸營勇圍攻五月初九日剿平之二十五日追至莫村督飭生員蕭萬安從九蕭學詠及勇練圍攻破其砦燒斃首匪鄧謙宇姚兆曾盡殲其衆咸豐七年四月二十五日平南川一里土匪曾三勾艇匪數千勢如飛蝗三江下里南股敦倫務倫羅塘嶺頭嶺詞白垵赤坭五屯所上下廂太平嶺社普諸村悉被焚劫練丁死難者五名三江上里團長鄧變亭覃泰階大任里貢生覃俊民等來援不克匪在和平五屯立糧臺五月初一日攻泰平惟下黎村被害最慘閏五月初四日平南惠政里團練克復平南縣匪喪胆退回川一賊巢十年七月十三日艇逆陷羅龍里雙村各民堡三江團長韋正甫督練救之不勝又招平南勁練數百救之不勝二十四日匪出和平復擾務倫營堡練勇內外夾擊之匪敗走邑令陳延齡防禦五屯見賊勢猖獗退守本依河南勇在嶺頭村者亦退去卓八知之復攻務倫堡平南

川四里團長李蔭芝來援堡內練丁奮勇夾擊賊退去斃匪一百餘名八月初二日賊攻座坳營堡不利斃匪十餘名初三日攻上里天馬寨又不利復直上木依攻陳縣令勇船官軍退上太平墟座坳遂失守男婦練勇死者三百六十餘人卓八自稱將軍大肆荼毒時各里人心奮怒羣俊民起練剿卓八環攻數日匪乃遁去十一月二十五日卓八又攻座坳人皆驚走陷河村篁地吳從道汝金父子死之吳汝光合家男婦十九人併其親屬五人皆被擄南股練救之不及十二月務倫座坳合力招南勇擊賊不克次年五月 蔣統帥益禮復中車卓八乃竄入坡頭何先拔處官兵破先拔賊巢卓八父子回易州卓詔遣人刺殺卓辛卓八傷而逃覃詔階之子獲卓八以獻梟首示衆

雜節鍾澤考古錄（藤邑舉人蘇時學字琴舫所著學問淵博賦性恬淡世家名儒也）

宋哲宗紹聖四年蘇軾移昌化郡安置弟轍貶雷州五月十一日相遇於藤

元符三年秦觀自雷州放還卒於藤州光華亭上

九月蘇軾北歸與藤州徐壽遊浮金亭

明洪武元年六月明兵取藤州

五年省鐔津縣入藤州

十一年改藤州爲藤縣

成化元年十二月韓雍大破大藤峽改名斷藤

二年韓雍檄知縣謝鉉修城

正德十年十二月五日天鼓鳴自東南至西北

萬曆三十一年以岑溪縣北科七山二鎮改屬藤縣

明崇禎八年正月十九日大雨雪（梁志）知縣梁昌修學

九年改縣城爲陽城 重建南蘆書院 冬大雪 是歲五屯所官與壩口把總條

陳各人汛地以東岸寺背專屬之軍中村壩口專屬之兵俾各有專責知縣梁昌通

詳依議(並同上)

十年知縣梁昌修縣志

十四年五月大水(陳志)

十六年三月大水(據蒼梧志)

國朝

順治三年夏六月明兩廣總督丁魁楚調梧州府屬兵援贛州(舊府志)

是歲大旱自二月至八月二十六日始雨歲饑(蒼梧志)

十一月明永明王立於肇慶改元永歷

四年正月永明王奔梧州走平樂廣東提督李成棟率兵趨梧州二十九日一鼓入

之明巡撫曹暉降時丁魁楚在岑溪成棟使杜永和襲而殺之藤江(楊陸榮三藩

紀事)

六月大水(蒼梧志云與萬歷四十年同)

七月十四日水師副將楊超反引明參將陳邦傳入梧州蒼梧南五鄉及戎墟羣不逞之徒招誘愚民號稱義師酷索富民謂之充餉及邦傳至營取副參遊都劄付益肆殘暴而藤岑容諸縣土棍各集紛出劫掠民不聊生（按藤志誤以此事屬順治二年茲據蒼梧志改正）

十一月李成棟復取梧州陳邦傳走潯州（府志）

五年三月廣東檄至李成棟挾佟養甲以叛迎永明王駐肇慶（府志）

夏四月大飢斗米五百錢

六年夏五月大水（蒼梧志）

七年正月永明王奔梧州（三藩事）六月大水（蒼梧志）

十月大兵下廣東十一月下桂林

庚寅十月初七日辛巳永歷挽舟梧州城外聞羊城盡失移舟西上不五里遂槍殺遍行上至藤縣分爲兩股從永歷者上右江若巖起恒馬吉朔是也餘則入容縣港

若王化澄等是也(吳六奇明季南畧)

瞿昌文粵行紀事云庚寅閏十一月十四日晤陳邦傳於濠江口數語別去順流下藤縣城內皆焦營盤踞謂宣國相對號勳留宿營中日夜風雨廿四日雨止別宣國渡藤江宿村舍(按焦謂焦璉時封宣國公)

八年正月十七日定南王左翼鎮前鋒馬驥取梧州二月十五日左翼鎮總兵馬蛟麟至梧鎮守(蒼梧舊志)

大兵下藤縣(明季稗史)

夏四月始開徵八年分糧

秋八月陳邦傳誘殺明廣西協守總兵焦璉至梧鎮降(並同上)

予鐔津詠古詩詠焦宣國云百戰危疆倚將才潯陽江上笛聲哀孤城舊是屯兵地落日青山萬馬來

九年七月李定國陷桂林八月陷梧州知府沈倫不屈死藤縣亦失

十二月初五日大兵復藤縣明總兵羅超戰歿（明季稗史）

八月李定國兵陷梧州大掠數日而去時提鎮馬雄出兵堵禦屢敗鎮道議以桂平皆陷恐梧州難守乃具舟斂老營避江中十五日賊奄至官兵又敗乃盡登舟徑下廣東文武官至九月杪方回（舊府志）

二臣全節傳云節間道走梧州與線國安馬雄軍合定國以衆來犯我兵失利節負重傷潰圍出乘舟至肇慶請兵於平南王尙可喜可喜遣水師助之乃還定梧州藤縣潯州

十一年李定國令其黨李先芳廖鳳躡藤縣總兵馬雄擊破之擒其所授知府江炎是年秋七月李定國兵復由西甯突至戎墟梧城戒嚴乃去（梧州舊志）

十三年巡撫于時躍題免十二年十三年分糧石
布政使張自昌諭民墾荒田官給牛種（並同上）

十八年六月大水（蒼梧志）

康熙元年地震

二年七月大水

四年八月又大水

十一年五月大水(蒼梧志)

十二年六月又大水

九月地震(同上)

十三年孫延齡叛附吳三桂梧州都司王邦相通欵延齡六月延齡遣僞總兵侯成德陷梧州盡拘其官屬軍民是月僞總兵陳士龍與藤縣土寇吳鳳乘亂襲破岑溪奪縣印脅縣令孫士恂示諭士民助餉募兵無賴者盡附之副榜高能徵誓衆拒逆有領劊者共誅之復糾鄉兵斬士龍於孝子祠鳳走義昌依土寇林萬勝七月成德聞援兵至宵遁八月總兵金光祖遣遊擊唐鳳守備管輝領兵三百守岑溪差官運餉道經義昌爲萬勝劫奪并殺差官熊徵復率鄉兵與官兵合攻萬勝斬之(据

府志及岑溪志

王邦相潛通欵於延齡招結土賊陳士龍周君道李梅友等聚眾抄掠五山狼目章國棟陷岑溪掠戎墟藤縣賊林萬勝據義昌鄉殺解餉官其時郡邑騷然旋皆鋤滅

(梧州府志)

甲寅滇黔告變粵西附之時羽雲唐君守臨賀義不從賊挈家詣肇初冬整族入岑予始獲訂交觀其貌恂恂若書生大約羊叔子杜武庫一流予隨以制軍命得在軍中親見其計誅林四截孫雲客破王邦相鬱北容等軍及在黃坡躬先士卒大致克捷其智勇兼備有足多者(高熊徵郢雪齋集)

四月復藤縣(東華錄)

七月王邦相復寇岑溪遊擊唐鳳敗之於容縣波里斬其長子邦相遁回容縣遂走潯州復聚黨攻陷藤縣守備羅文舉及竇家寨巡檢黃新德死之

八月十三日地震又大水

十五年春僞將王邦相據藤縣尋據梧州時邦相聞梧城官兵避賊東下肇慶遂入

梧仍招集各土鎮分掠懷集及德慶封川

六月大水(蒼梧志)

十六年秋七月大水巡撫廣西大將軍傅宏烈率兵復梧州僞總兵王邦相僞知府

蓋鴻及官民數百棄城走橋斷溺死唐鳳恢復容縣岑溪大破僞兵(岑溪志)

八月豁免十六年分錢糧

十七年三月吳逆僞將軍分犯潯梧桂林平樂等郡有

旨諭莽吉圖鎮梧州令穆成額與將軍額楚都統貝勒巡撫傅宏烈統兵協剿七月兵至

鬱林戰失利退守藤縣十二月藤縣失守

上復遣平南王尙之信及將軍舒恕率師赴援賊乃遁走(滿洲名臣成額傳)

七月八月大水淹民田無數

東華錄云康熙十七年十二月廣西城陷藤縣追梧州(漢名臣傅宏烈傳)

十七年六月賊兵數萬渡左江我兵與戰失利退守藤縣十月賊併力來犯藤縣失守遂迫梧州

滿名臣額楚傳云十七年詔同都統貝勒率兵駐梧州時廣東總兵祖澤清復叛自高州勾結山海諸賊犯電白額楚奉

詔會剿擊却賊衆進駐藤縣遇大疫士馬多病斃額楚以

聞命別擇要地移駐額楚疏言吳逆踞鬱林容縣潯州聲言三路來犯藤縣軍營未可動移但士馬應請增遣以備堵禦

上命其仍駐藤縣

諭將軍舒恕于南雄韶州兵內擇有馬者發額楚軍未至賊犯藤縣額楚同巡撫傅宏烈率兵禦擊失利退保梧州賊陷藤縣

將軍額楚征粵寇距藤縣二百餘里遇鬼城一座旗幟森列四門晝閉疑中有埋伏發兵攻之城破黑氣障天倏見毒蛇蜈蚣及蛛蝎等物從空飛出惡氣士卒觸之皆

體脹腹痛急撤兵而過

十八年正月宏烈自梧州分布水陸官兵乘賊來犯木城奮力夾擊鎗砲矢石齊發殲賊二千餘遂遣總兵譚昇取復藤縣（漢名臣傳宏烈傳）

十八年二月賊將吳世琮犯梧州額楚同莽吉圖傳宏烈擊却之（滿名臣額楚傳）

道光二十年十二月知縣溫鵬翀建訪蘇亭於浮金山麓以奉蘇文忠公

二十一年海疆告警梁中丞章鉅駐節梧州官兵經藤者絡繹不絕

二十二年冬知縣溫鵬翀修李衛公祠

二十四年夏大水

二十五年署縣江應澄改義學爲經古書院

始行團練於各鄉以東匪滋擾水道不靖故也

二十八年署縣劉繼祖修城

是年虎入城

冬十一月地震

建經古書院學舍

咸豐元年緩征

是歲城工告竣

四月增築砲臺於北門外

六月雷震砲臺

六年二月地震有聲

夏四月大饑斗米千錢

八年初設厘金廠

八月八日彗星見於西方

卷之二 雜記

(九百九八)

藤縣志卷之二十二

芳名志(前修志各官紳銜名)

主修

署 藤 縣 事 武 宣 縣 知 縣 高攀桂

叅閱

藤 縣 儒 學 教 諭 李程泌

藤 縣 儒 學 訓 導 蔣上紱

編纂

藤 州 書 院 掌 教 戊 午 科 舉 人 陳 鑰

叅纂

甲 子 科 舉 人 胡世拔

壬 子 科 歲 薦 李若桂

卷之二十二 銜名

(九百九九)

分纂兼校對

癸酉科舉人 陳翹

戊辰科舉人 李中寶

原任鬱林州訓導 蘇厚垣

原任博白縣教諭 吳斯璧

癸酉拔貢 黃時安

卽用通判 何宏元

茂才 霍鉉鏗

茂才 卓鳳儀

校刊

藤縣縣典史 彭信忠

藤縣白石寨巡檢 陶大本

藤縣寶家寨巡檢張開疆

探輯

試用訓導石廷珩

布政司經歷蘇麟

州政司經歷蘇麟

監生同陳漢懷

朝議大夫黃源洙

布政司理問蘇文珏

州政司理問唐健棟

附貢生石源

優生歐華石

庠生朱棠

庠

生

覃步賢

庠

生

石道

監

生

陳遠獻

廩

生

陳格言

廩

生

陳翼晃

監

生

石垣

廩

生

覃儒

廩

生

霍泰

增

生

黃元棠

庚

舉

陳正矩

貢

生

楊熾堅

貢

生

莫張

申

恩

科

武

唐統禮

貢州廩優增庠庠庠庠庠

生
性雅逸工山水
繪畫各圖

同

胡克安
何異蓮

祝贊明

莫耀奇

石曜

盧壯度

韋業編

李敦友

江溥泗

鄧恒滌

李郁章

郭宏才

辛酉科歲貢生 盧宏灼

增 孫鎮

庠 梁芳

庠 鄧秉焯

監 盧宏燿

戊辰舉人 朱純卉

戊午科歲貢生 江朝宗

廩 蘇自芳

廩 劉璣

廩 吳浩賢

廩 潘倬立

優 卓侗

增

增 增 增 庠 庠 庠 庠 庠 庠 庠 庠 庠 監

卷之三 街名

生 生 生 生 生 生 生 生 生 生 生 生

何學鉉 程可傳 莫詡進 吳斯型 劉揚 黃居正 黃體暢 馬廷班 龍沆 何雲超 黃祖昭 陳玠

(千零零五)

監 生 李 錦

監 生 李 錦 綸

丙 寅 科 歲 貢 生 梁 蒞 中

庠 生 唐 嗣 滄

庠 生 梁 甲

辛 酉 武 舉 黎 德 曜

庚 午 科 歲 貢 生 曾 光 祖

壬 申 科 歲 貢 生 石 士 灝

甲 戌 科 歲 貢 生 何 敬 一

廩 生 陳 謨

廩 生 鍾 毓 景

廩 生 黎 依 京

廩 監 監 監 庠 庠 庠 庠 庠 庠 增 廩

卷之二
二
銜
名

生 生 生 生 生 生 生 生 生 生 生 生
胡博甯 胡安 何勉修 鄧權義 李浦 覃上觀 盧超朗 李楚 吳之綱 徐之著 秦大經 黎依豐

(千零零七)

增 增 庠 庠 庠 庠 廩 廩 庠 庠 庠 監 庠

(千零零八)

生	生	生	生	生	生	生	生	生	生	生	生	生
徐麟修	徐海賢	黎知自	覃懋四	霍大源	李若蘭	李配琳	陳捷鰲	李樹端	李灼暢	陳銳		

譚津忠義錄序

嗚呼治亂之機雖曰天運豈非人事哉當承平日久在位以文酒徵逐爲橐舉間有念民生休戚舉地方利病者則羣以俗吏目之一旦有事姑息者爲福粉飾者爲功相習成風養成禍患遂至強者乘機弱者被脅而從狼顧鴟張毒流四海幾成不可收拾之勢後人見禍亂頻仍竭人謀而不足以挽救於是咸委諸天矣而天豈任咎乎藤邑之被亂也洪秀全以妖神夷鬼之教發難金田是時水陸各股匪聞風煽惑狡然思啓蹂躪所至民物蕩然攻城劫獄焚燬淫掠民不聊生而官愈不聊生矣痛深創鉅亂極思治於是練鄉團募客兵官紳戮力躬冒矢石塗萬衆之肝腦竭百萬之金錢而一邑始治嗟乎天下之治亂一省基之一省之治亂一邑基之其機微其理顯非歷其境者不知也 蘇爻山先生邑之碩學也勸亂之役無不從肇亂之事無不紀以撥亂之才善平治之畧其辭親而切其旨簡而賅其紀事宗綱目其褒貶寓春秋而斯邑之爲忠爲烈爲亂爲治無一不瞭如指掌令讀者不啻身親其境見

焚劫夷戮之慘益致謹於治亂之機而不敢以玩忽將則是篇之作以云備輶軒探擇者猶後也陳君贊臣 先生之高弟也欲廣師傳謀付手民命余爲之序余不敢以不敏辭爰撮大要誌其緣起後之閱是篇者其亦惕然於安不忘危治不忘亂之意也夫

光緒十七年歲在重光單閏仲春月上浣知藤縣事侯官吳徵鼉謹序

蘇爻山中翰鐔津忠義錄序

大凡文章之不朽者必得人而後傳况其有關志乘者哉梧藤蘇爻山中翰余總角交也後又同登道光丙午科本省鄉榜交情益篤時相切劘余通籍後迨奉職京華爻山以計偕北上風雨晤談因出其所著鐔津考古錄及爻山筆話寶墨樓詩抄並述及尙有墨子刊誤未刻並數年流離兵燹有所見聞必筆之於書益見好學不倦著作等身尤欣佩也禮闈報罷就職中翰旋即言歸蓋其淡泊素志然也丙子歲余由京而外宦轍量移苔岑遙隔魚雁難通徒增悵惘壬午乞假歸里聞爻山已歸道山憾不能撫棺一哭且惓惓於爻山尙有未竟之書不知曾付梓人與否及辛卯歲其高足 陳贊臣學博以補官晉省考驗惠以所刊鐔津忠義錄乃爻山遺書也因念十餘年欲觀之書今始得見且喜且慰昔吾鄉 張羽王先生作桂勝桂故兩書見於四庫全書提要後纂修通志多備采擇是書體例精詳立言有本已詳於 陳君跋語及 吳大令弁言無庸贅敘惟聞 陳君云鐔津考古錄尙有若干卷未刻

其夫人恐其遺失常置家內不與外人觀看年深日久剝蝕難免良可惜也墨子刊
誤迄今尙未得見猶待物色爰山始號琴舫同年齒錄所刻人共稱之並誌

光緒十七年歲次辛卯季冬上澣

賜進士出身

誥授榮祿大夫花翎二品頂戴前浙江補用道衢州府知府翰林院庶吉士吏部郎中軍

機處行走主講桂山孝廉書院

特恩賞給隨帶加一級年愚弟斬邦慶拜序

鍾津忠義錄跋

右鍾津忠義錄二卷余師爰山先生所著上卷爲列傳始職官終列女下卷爲紀事上自咸豐元年下迄同治五年皆紀當時忠義之人及各股匪出沒焚掠之事也嗚呼當洪逆弄兵金田不過燭火微熒澆之可以立熄而方面者旣不知兵又用違其人故勦之不力遂致賊一出永安繼圍桂林竄兩湖蹂三江僭僞號潰爛十餘省竭天下之全力用兵至二十年之久始行撲滅而兩粵之股匪與之相終始追論其由殊堪髮指先生目擊時艱憤心疾首著書風鶴交警之餘如賈太傅之痛哭流涕其志亦可知矣同治末年西撫重修省志徵采各府州縣遭亂事跡先生著此二卷惜未鐫板而遽歸道山勳光爲先生受業弟子懼其書不傳因借鈔見錄於其家鐫而傳諸世亦聊以繼先生表彰忠義之志云先生名 字敦元號爰山晚號猛陵山人道光丙午舉人官內閣中書著有爰山筆話墨子刊誤寶墨樓詩 鍾津考古錄

門人陳勳光謹跋

卷之三 雜錄

(千零十四)

潭津忠義錄卷一

古藤蘇文山先生著

本邑人名時學道光二十六年舉人

受業陳勳光輯刊

職官第一

劉繼祖

劉繼祖別字小竹江西龍南人道光間以增廣生援例候選同知署臺灣淡水以憂歸再調廣西二十六年署藤縣以才能稱嘗效趙廣漢懸鈔簿署門許告密者具狀詞夜納其中比曉發而視知以此奸弊無不周知而豪猾悉皆斂迹尤善治盜盜故與奸役通每當盜劫某鄉役輒虛張形勢以恐嚇縣官官畏蒞者輒疑懼不敢往捕即不得已而往必先示期數日然後啓行故盜得飽颺而勢益滋蔓公詢知其狀嘆曰烏有若是治盜可以得盜者不一日賊劫金鷄市報至方讞獄未畢亟集衆稱妮前行併飛檄鄰鄉令堵其歸路賊不意公猝至皆錯愕不知所爲悉就擒無枉濫者其才識敏捷皆此類也上憲嘉其能晉秩知府署思恩歲餘去旋以招撫事坐累罷

官益憤惋不平自矢此生決不與賊並立適翟公登峨蒞藤自以年衰懇相助爲理公察其意誠許之已而曰內患不除禍未熄也乃按誅奸役之與賊通者城內肅然自是益修守備併添築北門砲台以壯形勢賊嚴憚之未幾賊下攻梧州遂調練勇四千防守四門巡視晝夜無懈俄以籌餉未集次第罷歸賊偵知急伺圍城公親自督戰柱持矢石間殲賊甚衆賊恟懼欲解圍適有以城中虛實告者賊益集衆來攻窮晝夜砲聲不絕翼日而陷公持矛巷戰死於城內大街時八月十日漏下已四鼓矣賊素憚公威名越月後有假公名號以圖恢復者賊聞輒震懾久之蓋尙疑公未死云事聞

贈按察使銜子一子世襲雲騎尉

翟登峨

翟登峨字葵陽一字梅阜山東章邱人嘉慶二十四年舉鄉試第一以謁選爲蒲臺教官道光二十一年成進士需次爲令署陸川咸豐三年知藤縣年已耄矣適候補

府劉公繼祖以罷官寄廬於藤公自以才不逮劉請上憲委劉專辦賊務而自以下之劉亦悉心經畫事皆就緒賊嚴憚之然以賊勢方熾嘗派練勇數千守城俄以缺餉罷歸賊偵知城中人少併力來攻攻五日而陷劉公戰死公被執公子襄柔死之明年四月公遇害於肇慶時賊方爲張觀察敬修所圍勢已窮蹙公決其必敗密以書授家人約官兵速來滅賊賊首梁培友廉得其書怒而戕之棄屍於江

宋尙述

宋尙述字杏友浙江山陰人寄廬桂林官梧州府經歷咸豐七年署藤篆十年三月十七日捕賊三江里遇害

陳延齡

陳延齡字鶴翔直隸大興人以主簿任梧州府經歷咸豐十年藤令宋尙述死於寇上憲委延齡往署縣事時賊黨甚盛衆疑懼不欲前行竟單騎赴任境內帖然旋駐劄太平適賊首羅華觀擁衆來犯亟集團與衆官軍合擊大敗之尤慷慨自許遇敵

輒踴躍當先未嘗畏怯人益嘉之暇輒修城池講守禦前後蒞藤兩次皆有能聲後以暑月征大案賊暴卒於軍人尤痛惜有傳其爲城隍神雖譎語無據亦足徵遺愛在人功不可沒云

冉正棠〔妻孫氏附〕

冉正棠字蔭臣四川人咸豐二年任藤縣典史明年八月賊大至正棠憂之語妻孫氏曰事至此倘不測奈何時孫方舉子周昨慨然曰君死官妾死君宜矣妾必不負君者唯此呱呱者殊可念耳已調知事不可爲輒指懷中兒語正棠曰某質肆中有井妾與兒當盡此毋令污賊手也俄而城陷則孫氏抱兒赴井死矣正棠被執遇害未幾賊驅衆練丁昇死屍棄於江孫氏屍出井中懷中猶抱死兒牢不可脫時在賊中見者皆色然而駭或以袖障面至不忍視云事聞 賜卹如例孫氏予旌表建坊

李定邦

李定邦懷集人道光間授藤縣千總恂恂儒雅尤善撫馭得士卒心尋調懷集營守

備咸豐四年寇起攻懷集城竭力堵禦未幾城陷不屈死之

鄧紹邦

鄧紹邦蒼梧人道光二十九年任藤縣千總明年夏月山賊唐文中作亂劫掠村莊
紹邦率兵隨署縣陳寶往捕直抵賊巢賊盡擁而至兵役駭散紹邦衆寡不敵遂遇
害事聞 賜卹蔭一子

卷之二
雜錄

(千零二十)

鍾津忠義錄卷二

古藤蘇爻山先生著

受業陳勳光輯刊

列傳第二

黃岳位

黃岳位太平鄉人道光間國子生時邑中土寇起岳位所居鳳箚山與蒼梧安平鄉鄰時有警岳位團練鄉勇屢挫賊鋒賊嚴憚之故鳳箚練勇甲一邑咸豐四年閏七月奉調守城時水賊方自趨梧勢張甚衆倚岳位差自安無何賊溯流上遂圍城城四門東北皆濱江北門新築砲台甚險賊憚於攻乃直趨西南二門踞高阜瞰城中昇三千觔大砲以轟之聲晝夜不絕瓦礫皆碎一日譁言西北角崩賊蛾傳而上急傾火器以擲之賊被蒸死傷甚衆稍卻俄而岳位中砲殞於城樓衆惶駭氣奪城遂不守時八月十日也衆殮岳位既畢賊憾甚索其棺發之棄屍於江事聞

賜卹

吳錫 黃勝華 朱啓後 蘇敦和 子振興

吳錫 孝義鄉人居一都瓦窰村道光武生咸豐四年閏七月縣有寇警奉調守城未幾城陷死於寇事聞

賜卹同時死難者有額外外委黃勝華練長朱啓後蘇敦和之屬啓後三江里人敦和勝華並五袴廂人敦和先與劉公繼祖謀誅賊內應賊尤切齒及是城陷死於江其子振興遇賊巷戰被執死尤慘酷云

蕭 渙

蕭 渙 字引鳳五袴廂人上世居順德龍江祖年長國子生乾隆間徙藤至渙已三世有籍貫例得應童子試邑諸生惡其崛強譁而攻之卒不得與試遂以醫卜術業市中温侯鵬翀喜之爲給署陰陽生咸豐四年八月賊攻城晝夜砲聲不絕閱五日守陣者皆怠適城有內應遂陷時漏下四鼓渙方派守東北隅疲極倚女牆假寐一賊過而蹴之曰起起渙怡然曰吾知盡忠報國而已賊怒斮之年六十一須臾火光

起城中大亂死者數百人明日賊下令驅衆練丁昇死者棄於江岸畢併殺而沈之
適渙死處距家近家人負屍以匿故得全

蘇和

蘇和一名厚裕五袴廂人其先與南隅廂蘇氏同祖少以貧役典史署中嗜酒無賴
人莫之奇也咸豐四年八月流寇陷藤典史冉正棠與其妻孫氏並殉難和喟然曰
城破官死宜矣吾儕不死更何待乎遽取阿芙蓉和酒飲飲竟不死遽以首觸牆
額破骨折血淋漓被體又不死或謂之曰城破官死宜矣若賤役何死爲和怒叱更
索廚刀刎其喉而絕

論曰寇氛遍地以來士大夫之遜跡山林而優游俯仰以全其生者衆矣奚有於和
者和固可以無死者也然爲和可以無死而惟和竟死嗚呼壯哉

黎聖弼

黎聖弼義昌鄉臘峒村人國子生咸豐間爲練長性剛嫉惡時義昌賊起擒其傑黠

者送縣誅之賊方抱憾未發也俄而亂作羣執而戕之賀村

楊際春

楊際春字堂西感義鄉竇家寨人祖熾堅嘉慶庚申武舉際春獨恂恂儒雅道光間入泮值世亂所居與自良賊邇受其荼毒常憤惋不平咸豐五年九月衆譏搗自良賊巢際春慨然願爲鄉導亟率所部以身先之俄以後援不繼而潰際春被執見賊渠嫚罵不屈賊恨甚令遍游歷諸賊巢然後刳腸以死聞者傷之同治五年奉

旨賜卹併入祀本籍府縣昭忠祠

歐寅時

歐寅時字春及仁風鄉琅南村人高祖學以舉人歷官廣東湖南知縣寅時性抗直以藝術名援例得從九職銜咸豐七年賊踞海來村率衆往禦而敗爲賊所執

數日死臨終賦詩云六十年來數已終

君恩未報望無窮縱教白骨埋青草剩有丹心貫大空聞者壯之同治五年當事者

奏聞奉

上諭着照七品以下官陣亡例給予全葬銀壹佰兩一次致祭銀六兩並與其殉難次子令復入祀本籍府縣昭忠祠

何信之

何信之太平鄉人生有異稟膂力過人嘗與人博搦不勝遽以錢數十貫實臺橐中挾而走見者駭之已而地方寇起練集鄉勇自爲一隊遇敵輒先登陷陣奉旗斬級而還賊衆憚其勇敢見輒驚避鄉里賴之丁巳梧州被圍閱數月糧盡垂陷諸軍憚賊饑莫敢逼信之獨慷慨仗義辦糧數百石由陸路轉至大灘江口密約守陣者接應賊覺來爭圍之數十重信之左右跳蕩擊殺數十賊力竭被執死同行數十人無一生還者

莫過培

莫過培字書農仁風鄉人嘗援例得府知事銜咸豐間以辦團普保州同丁巳五月

聞鄰村海來陷亟率衆往援弗克止焉賊羈之別館鬱鬱數日死同治五年奏聞
奉

旨入祀府縣昭忠祠

容有莊

容有莊感義鄉都萌村人以入費爲國子生成豐間自良賊起各村寨與鄰者憚其
兇威咸唯唯聽命唯有莊力與賊抗屢挫其鋒以一身當強寇凡七八年賊每經其
營寨無不視爲畏途也丁巳郡城陷賊饑益張謂留此彈丸終爲後患益集衆來攻
有莊深溝固壘賊無可如何乃設圍以困之久而糧盡援絕誓遂不守賊憾其倔強
盡屠居民有莊合家被難唯一子恒裕伏隱處得全然自是賊益橫行無忌矣恒裕
有志節逃之鄰若收集遺衆慨然以復仇爲念未幾病卒同治五年春當事以有莊
及殉難諸人彙奏奉

旨賜卹並入祀府縣昭忠祠

王家材

王家材感義鄉羅紋洲人國子生咸豐七年九月己丑賊陷村堡被執不屈明年二月死於大坡同治五年奉

旨賜卹並入祀府縣昭忠祠

卓識

卓識字裕英三江里荔枝峒人同知佃從孫也咸豐間保舉外委署平南城守戊午二月蓮塘賊首張高友掠三江識拒戰被執死之

劉品儒

劉品儒二都富安村人邑增生當道光季年地方有警能盡心團務鄉里賴之嘗有武弁鄧青追賊至藤過其境衣冠踉蹌衆疑爲賊品儒命執以送縣將入城始知誤乃親釋其縛而致謝焉鄧不以爲憾反嘉其胆識過人曰辦公者當若是矣咸豐九年三月潯賊犯梧弗克聞藤邑令駐富安亟遣賊目梁贊驅萬衆以臨之令懼而逃

品儒誓衆死守將闕堯鑰槌閉其竅俾畏葸莫能私逸以堅其志無何賊蠶擁至闕衆單弱遂不守品儒死之同死五千餘人時謂寇亂以來騰之諸鄉受荼毒者尤以富安爲最慘云同治五年奏聞奉

上諭照兵丁陣亡例議給卹典入祀本籍府縣昭忠祠

吳祥道

吳祥道三江里座峒村人父殿邦捐藩理問識咸豐十年寇陷村堡祥道見父被執遂奮身格開刺殺數人而後死年三十九

歐華國

歐華國字觀光別字震坡十都垠南村人爲寅時族子道光間補郡增廣生潛心古易嘗讀未濟象辭至濡其尾亦不知極也九二貞吉中以行正也頗疑極字費解且象辭皆韻而極與正不叶當有誤反覆久之寔然曰是固拯字之訛爾其精識類此咸豐初會匪滋蔓据蒼梧新利墟與琅南密邇欲垂涎久矣以守備嚴猝不得逞甲

寅正月賊偵知鄰村有游庠者因僞具禮物而衣冠作賀客狀潛貯兵刃囊中凌晨抵村外人尙未起亟排牆以進鎗砲遽發人始知有賊驚悸不知所爲華國急懸賞擊賊而飛書鄰團索援與賊撐持久之俄而援衆大集賊披靡遁去追殲數十名賊自是無窺琅南者八月縣城陷賊傳檄各鄉趨紳民急詣縣晉謁否且立屠衆惶懼莫敢支吾華國慨然曰此逆賊也烏有口誦聖賢乃可從賊者乎亟取僞檄碎之賊聞大怒悉衆來攻亟集團邀擊敗之沙黃村殲賊數百已而隨衆取復縣城蒼梧賊復伺間來窺輒先覺擊卻之丁己郡城陷賊逾熾避地者咸趨琅南益樹柵自固己未賊盡破鄰團各寨遂併力來犯一夕柵破蒼皇出走後二年終年六十九

梁文軾

梁文軾嘉應人爲龍南劉公親黨劉以事罷官旋奉檄來藤留辦賊務文軾從焉素以勇畧聞劉甚委任俄而寇至命督率鄉勇守城外鷄谷山竭力堵禦未幾衆潰文軾死之年二十五

卷之三
雜錄

(千零三十)

鍾津忠義錄卷三

古藤蘇文山先生著

受業陳勳光輯刊

列女第三

李可珍妻文氏

李可珍妻文氏九都待村人增生經邦女咸豐三年賊劫村莊拒賊而死

張世榮妻鍾氏

張世榮妻鍾氏五磅廂人適張而寡年四十餘有勇力咸豐四年艇匪數千自梧湖流上圍藤縣城容縣自負賊應之合萬餘人晝夜環攻時城中丁壯少當事派婦女登陴守禦各執瓦礫擲賊賊死傷甚衆閱五日城陷衆惶遽奔避鍾獨持矛力戰刺殺數賊而後死同時有烈女某逸其名慷慨罵賊死於城隅年十五六貌婉好雙趺織小自城中逸出者咸見之竟不知何許人也

廩生覃煥邦妻全氏

廩生覃煥邦妻全氏太平鄉思盧村人咸豐七年避地冷水堡是年堡陷全被執至大馬河赴水死年二十四

陳六姐

陳六姐羅紋洲人適同里周十一爲妻咸豐七年九月自良賊破羅紋洲被執遇害陳被擄至賊營不屈昏夜赴水死之

廩生李掄元妻成氏

廩生李掄元妻成氏羅平村人家陳村咸豐八年八月負幼子歸甯中途猝遇賊至驅以行賊固佃掄元田者成瞥見之罵曰若固佃我田者曷敢若是賊不顧以刃迫之益罵不絕口賊怒斫之

武生梁天保妻歐陽氏

武生梁天保妻歐陽氏家二都富安村咸豐九年三月賊破富安斃氏姿色欲犯之堅拒不從遂遇害

林拔芹妻李氏

林拔芹妻李氏家二都富安村咸豐九年村破以姑老扶而走賊追至舉刀斫之李以身護姑連被數刃以死賊去姑獲免

梁阿妹

梁阿妹富安村梁拔材之女也己未富安破女年十四隨母避賊賊追至害其母見女有色留之女佯順從乘賊不意突以小刀割其腹而殺之俄而事露女亦死

秦大綸妻蘇氏

秦大綸妻蘇氏南隅廂人家一都瓦窰村年二十四夫卒遺腹產一女自誓守節撫從子爲嗣歷五十五年七十九以寇難終先是咸豐初寇氛起嗣子已前歿遂避地楊村依外孫陳氏一日譁言寇至或勸宜速行不可村遂被圍經月不解或欲俟夜靜時遣大力者負以突圍益不可未幾闢破村人殉焉遂被難以出卒於壽富圖時咸豐十年正月六日也

廩生劉應昇妻蒙氏

廩生劉應昇妻蒙氏仁風鄉峒口村人咸豐十年二月賊擄村堡蒙伏莽中凡六七日晝絕食夜潛出飲水鄉人偵知之告應昇昇至外家已遍身荆棘氣息奄然三日卒年二十八其苦志有足嘉云

黃建創妻唐氏

黃建創妻唐氏感義鄉社峒村人咸豐十年十一月大洪賊過境挈二女十姐十一姐子穎達媳謝氏避入營砦賊卒衆來攻俄而寨破合家誓不從賊同時遇害

鍾津忠義錄

古藤蘇文山先生著

受業陳勤先輯刊

紀事

咸豐元年緩征 三月大雨雹雷震九牛於白坭塘

八月潯州金田賊自平南竄永安經楊喇里鄉人集衆拒之獲其砲船 是歲藤縣

城工竣 有李結實如瓜 民訛言母雞剪翼不祥驗之果然一時毋敢畜母雞者

二年廣東水賊任文炳關福梁長等攻藤縣城大掠而去復下攻梧州 二月金田

賊棄永安而圍桂林 三日任文炳等復自梧州西上時官軍數千邀擊于榕潭弗

克再禦於藤又敗賊遂擾潯州

去歲臘月賊自東省揚帆西上黨猶未盛既劫掠藤梧卽欲飽颺而散三月下至

賀縣江口爲官軍所敗始惶懼不敢東歸益招集徒衆一時烏合聚至數千遂溯

流直上擾平南及潯州貴縣

時道員楊彤如參將明 督師南門守備徐紹烈候補縣張鳳鳴督帶全州兵

勇駐藤州書院委員聞勳管帶聞勇駐東門而署縣張鵬萬亦招集各鄉練勇數

千遍劄縣城內外追賊既西上官軍尾而追之所調各鄉練勇亦罷

四月桂林圍解 六月徐宮保廣縉兵駐梧州十一日賊自上游竄下官軍逆擊大

敗之任文炳死關福逸梁長逃至濛江被獲伏誅 八月彗星見 雷風鄉人擒賊

渠張釗以獻誅之

三年五月劇賊田方侯成伏誅

田方侯成與張釗同時就撫而其黨劫掠愈甚陳太守瑞之惡其反覆與候補府

密圖之佯招二人宴飲而陰伏潮勇刺殺之赦其餘黨

九月大坡賊劫羅平村 十月劫思盧村 知縣翟登峨蒞任前候補府劉繼祖來

藤留辦賊務 十二月容縣自良賊踞老鴉塘時有客艘數百沿繡江下賊尾而劫

之遂踞老鴉塘欲窺藤縣

先是劇賊田方混名大鯉魚盤踞戎墟及自良等處一時無賴奉爲渠魁恣行劫掠方既戮死其黨梁培友等橫行鬱江時人呼爲鯉魚恩每以包送商旅爲名獲重利無算則益置砲械修船隻所經地方皆瞪視無敢詰問者

時盜風盛行有義昌江黎氏子以應試赴梧爲賊所拘扃之密室重索贖錢黎伴爲童駭俾守賊不以爲意乃俟賊熟寐刺而殺之賁夜逃歸

四年正月蒼梧新利墟賊犯垠南村生員歐華國集團敗之 二月自良賊遁衆村密讒擊賊賊偵知之夜遁衆追至黃沙不及而還 三月候補府劉繼祖誅賊內應時衙役久與賊通而坐享其利每官偵賊輒張皇聲勢以恫喝之令憚懼者輒爲所制莫敢誰何劉公深悉其狀伴爲不知而陰召潮勇守城部署定急閉門搜捕籍其尤無狀者按名誅之餘黨散逸

四月增築砲台於北門外 大黎里何先拔擾太平墟及三江里知縣翟登峨往禦不克而還 六月雷震砲台 早稻大熟 七月水賊梁培友關鉅等攻梧州城自

良賊擾十八都知縣翟登峨千總劉松芳往禦不克而還 閏七月初九日大破賊
廬二十襲容縣據之

時知縣王令示期考試廬令羣賊僞爲應試者以黎明突至縣城衆方熟寐乃露
刃一呼咸震懾莫敢支吾王遂被執幽於賊營

是月劉松芳往梧請兵防禦 八月賊攻梧州不克分其黨上攻藤縣自良賊馮道
和(即馮六)應之 十一月丁未藤縣城陷前候補府劉繼祖與史冉正崇與其妻
孫氏皆死之知縣翟登峨被執城中死者數百人自良賊遂據藤縣城 九月賊攻
垣南村生員歐華國集團敗之 是月廬二十自容縣遁回大坡土賊范音遂據容
縣 十月梧州圍解道員張敬修及千總劉松芳督兵西上二十三日駐於藤各鄉
以衆來會賊嬰城拒守衆環攻之賊慌懼俟夜漏稍息遂縱火焚街棄城而逸明日
官軍復藤城馮道和遁回自良是役也唯七都團長侯選從九李迪雲以殉傷至斃
餘不損一人而全城取復殆有天意云 十一月自良賊復來犯距城十里許千總

劉松芳率衆往擊賊遁追至富洞不及而還 十二月義昌賊擾十五都劉松芳率衆往擊賊遁

是歲 月懷集縣城亦被賊攻陷知縣史勳及守備李定邦教諭何元崇訓導龍恩寵皆死之

五年正月二十日自良賊突至縣城以有備而去 二月署縣雷葆初率練征自良賊至竇家寨不克而還

四月前知縣翟登峨遇害於端州 是月水賊李文茂等被東省官兵擊敗率其黨萬餘西竄至藤踞縣城俄而逸去上躡大黃江遂圍潯州八月永安賊劫岑婆寨是月十六日水賊陷潯州府知府劉體舒（雲南景東廳人進士）桂平知縣李慶福（英德人）前知縣舒華（滿州人）皆死之賊僞改潯州府爲秀州府 九月諸生楊際春率衆攻自良賊被執死之

六年正月何先拔與大接賊許多良等劫大任里高田村 二月地震有聲 時賊

渠李文茂僭稱平靖王梁培友僭稱平東王區潤僭稱平西王陳開僭稱鎮南王陳昌僭稱定北王併僞署公侯以下各有差署縣陳瀚駐訪蘇亭 六月李文茂圍柳州府 七月潯賊陷平南知縣李載文死之 賊自潯突至焚訪蘇亭及縣署取魚影石以去旋棄諸江 署縣陳瀚退駐富安村 是月二十一日領兵蘇海以水師敗績於龍港海僅以身免大坡賊劫燕塘村土賊焚泗涪河各村 八月大坡賊數百據高田村感義鄉團長盧彥彰等圍而殲之 十月初八日平南賊曾三及潯賊陳開等擾太平墟 十一月廣東賊區應突至三江里襲太平墟據之鄉人集衆邀擊之焚其廬舍殲賊數百名 是月二十三日蒼梧新利墟賊踞孔良村九都團練合擊敗之殲賊百餘名

七年元旦蒼梧新利墟賊突至義昌鄉襲太平坡據之大坡賊許多良等立稅廠於灘江官兵擊走之 是月末旬署縣陳瀚自富安進駐三眼堡帥衆攻義昌賊不克而還

時賊據梁峒廟中衆團力攻不克有高州健婦蔡明姬以大澤勇應募婦年三十許裝束如男兒矯捷善鬪能飛援牆壁所用大刀重十餘斤誓將搗其巢穴官嘉其志尅期進攻賊偵知之俄以大隊來官軍懼衆寡不敵倉卒引還

二月六日容縣賊范音等陷北流縣知縣蕭暄及邑紳梁宗敏死之 是月二十日李文茂陷柳州城 三月梁培友攻平南廖村中砲而殞 夏四月大饑斗米千錢 二十七日坡頭賊陷安洞村 五月初三日平南賊曾三等率黨萬餘突至太平墟踞之擾三江里入東皇破下黎橫橋死者八十餘人踰月而遁 是月七日坡頭賊踞山琶村 十四日據岑堡村 水賊擾屯江衆團練擊却之 是月初八日賊陷平樂府 是月潯州賊區潤等率千餘艘順流至藤歸縣城令其黨破新車塘寨屠之死者數百人

先是甲寅八月自良賊攻破藤邑盤踞七旬已聞官兵至棄而遁經馬氏莊（即新車塘）村人奪其輜重而逸之賊憾未釋故七年五月賊再至據城攻馬氏莊

而屠之

時賊聞童謠有清明折柳立秋下梧之說遂決計圍梧

閏五月七日丁亥賊渠區潤等圍梧州 庚寅義昌賊數百突至海來村入之各鄉團長赴援不克候選州同莫遇培及從九品歐寅時咸被執侷僚以死遂據海來不去焚劫附近數十村 七月十三日二賊目至赤水訛索蘇氏子履平誘而殲之

十四日水賊樓羅龍里各村至八月初旬而退 賊久圍梧州自六月至八月城中糧盡煮皮革以食餓死者數萬人益堅守無叛去者藤縣義勇何信之及降賊鍾敏和並運糧至梧弗克達信之被執死鍾退山寨賊圍而殺之 是月領兵蘇海以水師敗績於祿步被執死之時潯州府知府倪濤（字小汀浙江仁和人道光甲辰進士蒼）梧知縣彭昌集皆以出城募兵爲賊拘執遂同日被害於戎墟

當海兵旣敗或有勸海逃避者海喟然曰兵出兩次無功更何面目見江東父老乎遂慷慨就死 蒼梧彭令初蒞任首撫羅華官欲以恩羈縻之而華官願陰與

賊通一聞賊至即縛令獻賊其反復若是

八月初十日戊午區澗等陷梧州府城太守陳瑞芝全軍以出署梧州協副將蔣福長（原任右江鎮總兵）及典史黃錫惠（昭平樟木巡檢）死之按察使黃鍾音出城遇害學使沈炳垣被執賊送之潯州遂爲僧紳士殉難者有貢生施彰文賊既據梧城遂僞改梧州府爲秀江府蒼梧縣爲秀平縣藤縣爲藤州尋僞賊目羅華官爲僞知府僞招討使郭礪溪爲僞知州 九月十一日自良賊破羅紋州死者三百餘人 是月有巨魚見榕潭峽中身橫丈餘鬚高數尺目光如炬附近居民咸見之數日而沒 十月十三日賊盡燔縣署 二十四日學使沈炳垣遇害於梧

初賊送沈公於潯之西山寺主僧不敢留仍幽於梧時葉制軍遣人察公耗賊疑公與官軍通遂遇害并焚其屍公武林海鹽人道光乙巳進士事聞贈內閣學士兼禮部侍郎諡文節奉

旨建祠於桂林

自良賊破都盟村監生容有莊死之念八日乙巳自良大坡賊破羅平村同日坡頭賊破大寺營明日破冷水堡殉難者甚衆 是月僞國公梁鸞自梧下犯祿步官軍逆擊大敗之鸞自焚死

八年正月平樂蓮塘賊首張高友掠太平墟外委卓識拒賊死之 二月水賊五十餘艘掠屯江各處團練擊却之

是年春間太平墟三江口河水自相冲擊撼岸振船人以爲水鬪此兵兆也

四月十七日官軍大破賊于封川城外賊西竄棄梧州而去明日癸亥官軍復梧州府遂復藤縣 六月官軍復北流縣 七月念三日大坡賊破三十四都藤底村監生潘茂樟死之 始設釐金廠於白沙以稅本邑商船 八月潯賊下擾藤縣掠和平墟

彗星見於西方 是歲區潤僭位於潯州三日爲其下所殺陳開代領其衆僞號大成

九年二月二十五日潯梧復下赤水焚其廬舍死者數十人下攻梧州不克三月復自梧西上再焚赤水廬舍之不盡者遂上据藤縣時署縣宋尙述駐富安二十四日賊破富安屠之死者五千餘人惟署縣僅以身免未幾賊以縣城殘燬已甚不守而去 是月大坡賊目覃阿稅遍擾二十八都各村下之 五月蒼梧賊破界峒村 六月十五日癸丑賊破大梳砦 坡頭賊破古思堡 八月羣賊圍陳底深塘各村索重賂以去 大按賊破古集鹿塘各村 九月三日羣賊破嚴嶺村屠之死者二百餘人遂進攻十六洞入而据之 大按賊破上峽村 是月潯賊復由濠江入和平墟衆團練擊却之 西甯縣鄉勇數百突至赤水復仇以有備不發而還 十月十一日新利墟羣賊會同大坡糯峒各賊合圍楊村 十一月初八日大坡賊破上峒公局團長鄧肇基遇害 二十三日羣賊破楊村團長陳華國死之同死者二百餘人 是月金田賊首翼王石達開率衆數萬竄回廣西擾藤縣太平和平各處 十二月四日羣賊破琅南村

是歲夏秋後容縣平南縣賊擾感義鄉藤縣糯峒墟及蒼梧新利墟賊擾義昌仁封孝義各鄉各破一寨輒占其土田私爲己有而取其歲入焉於是大坡賊目覃阿稅首設糧台於虎跳此外富安村十六峒三眼堡糯峒墟並分設賊館以歛各鄉租稅而繡江東南皆賊藪矣

十年正月初三日地震 三月十七日署縣宋尙述往三江里礮底村捕賊遇害

四月十五日府經歷陳延齡代理縣事至藤駐太平墟 七月十三日潯賊入濠江擾和平墟 八月土匪卓八破三江里座峒村死者三百餘人署縣陳延齡勘驗合埋一塚 十月十日東匪僞南興王陳金剛被官兵擊敗率其黨萬餘西竄由蒼梧安平鄉渡江至藤駐三眼堡進據波塘攻皇華江諸峒下之遂擾岑溪 是月二十六日大洪賊破社峒峒死者二百餘人

大洪賊即陳金剛之黨留住三十八都古達村數月乃去

是歲蔣方伯益澧平蒼梧下郢賊巢賊首羅華官等竄逸至藤遂走潯州餘黨留踞

富安

十一年正月水賊破潯洲 十八日逸賊羅華官復自潯突至擾太平墟及楊峒里
署縣陳延齡會同候補府蔣本蓉合擊大敗之賊遁 是月陳金剛攻陷信宜縣據
之 三月二十一日潯賊踞和平墟 土賊卓八據座峒 四月六日蒼梧賊破沙
黃村潯賊擾楊峒里又陷羅龍里陳村堡 五月蔣方伯委候補府蔣本蓉以湘勇
五千攻坡頭賊寨克之賊目何先拔退踞金屯山卓八逸去未幾被獲伏誅 六月
四日蔣方伯大兵西上復藤縣城碣石鎮總兵李楊陞以水師來會進剿潯州 始
立城鄉團練總局 七月十四日李鎮以水師駐平南丹竹潯賊併力來犯官軍與
團練合擊大敗之溺水死者數千潯賊棄城而遁 十六日蔣方伯復潯州府降陳
開以獻誅之 始設抽釐於濛江派同知一員經理濛鬱二江稅務 經歷陳延齡
撫楊峒里賊 二十七日署縣浦錚蒞任 是月義昌賊據思旺復據孝義仁風二
鄉 十一月各兵勇困何先拔於滿村獲其親屬於坡頭賊皆誅之未幾先拔復令

其黨蘇元章破陳村死者七十餘勢復大振 是月大坡賊擾三十九都又陷冷水

堡 十二月大坡賊黃大破蒙登村屠之遂掠沙田擄數百人以去 雨水冰

同治元年正月都司何元鳳管帶恩勇駐城外雞谷山二月參將利輝遣把總梁光
管帶扒船八隻駐城外東江口 三月初一知縣浦鐸以憂去署縣陳延齡再任賊

劫楊峒里上風門村是月賊自老鴉塘突至縣城衆兵奮力夾攻賊遁夏何先拔攻

北岸各堡殺傷二百餘人 六月前知府趙元模派把總謝蘭和管帶端勇二百餘

人駐東門外 秋七月署縣陳延齡督脩東南破壞城垣六十餘丈併加高雉堞設

四方敵樓九座 何先拔投誠已而復叛 署縣陳延齡撫大按賊 十二月初四

日陳侯御事 州張葆光蒞任署縣事

二年三月十五日大 前署縣陳延齡督帶陶勇征大按賊 四月張葆 協同

都司李開學駐太平墟勦大按賊 五月領兵 員蔣澤春駐兵鬱林容縣賊黨廿

木乞降

先是正月間甘木與賊渠范音有隙數率衆相攻甘懼不勝遣使詣鬱投誠併乞爲援大帥責其立功自贖乃許之甘遂日與范鬪賊勢由是始衰

七月前署縣陳延齡兵至大接暴卒於軍

時賊渠聞陳侯至僞若投誠者爭具酒食犒軍而陰以毒藥藥之以進陳侯信而不疑遂及於禍

八月十五日候補道蔣澤春領兵復容縣城賊渠范音敗走十里遂奔自良時賊目覃阿稅據寶家寨以書邀范音約爲援音信而許之 九月范音挾其輜重妻妾乘船至寶家阿稅詣船迎接甚恭陰遣人分散其黨而邀音至家拜其父留飲甚歡酒罷突出力士擒之幽諸密室 是月十八日張邑侯以事罷官署縣景星蒞任遂與署協唐元芳征大接賊而復叛 十一月十五日覃阿稅以范音獻容縣大營 十八日覃阿稅親詣蔣觀察營伏罪蔣赦而遣之更其名曰乃輔 時金雞糯峒諸賊聞范音被擒皆震懾喪魄互相猜疑遂以次詣大營降 是月陳金剛亦爲其下鄭

金所殺以其衆詣崑官保壽大營乞降官保受之信宜縣亦平 署梧協叅將唐元

芳水師叅將利輝管帶道勇叅將胡高志等來藤駐劄各鄉從賊者皆薙髮爲民

十二月范音伏誅

時范之輜重及羣妾皆爲覃乃輔所得唯一妾某氏獨痛哭嫚罵碎其食器而擲之乃輔慙怒遣人沈之於江

廣元芳駐兵於森村說八都賊目歸順經旬不下胡高志自古祀村移營撲之賊震懾乞降遂散其黨毀其巢是歲始設抽釐廠於繡江

先是賊踞繡江出入商船皆有稅官軍至而仍之遂爲繡江商稅之始

鄉先正袁崇煥督師事畧（據明史本傳參以皇朝開國方畧 錢家脩辨冤
疏程本直流聲記余 成剖肝錄若夏允彝幸存錄竹塢遺民烈皇小識皆書
生談朝事訛者十之三四於督師固多微詞亦竊取一二至其家世則本諸鄉
里舊聞）

後學何壽謙編輯

鄉先正袁督師者藤縣太平鄉白馬村（一名蓮塘村）人也諱崇煥字元素其先東
莞人父子鵬遊西江過藤慕白馬山川之勝遂卜居焉兄弟三人次崇燦季崇煜督
師其長也明萬歷丙午舉於鄉已未成進士授邵武知縣爲人慷慨負膽畧好談兵
以邊才自許爲閩中令分校闈中日呼一老兵習遼事者與之談兵絕不閱卷或問
之則曰士子宜中者自有命在隨意抽取可也天啓二年正月朝覲在都御史侯恂
請破格用之擢兵部主事無何廣甯師潰廷議扼山海關崇煥卽單騎出閱關內外
部中失袁主事訝之家人亦莫知所往已還朝具言關上形勢曰予我軍馬錢穀我

一人足守此廷臣益稱其才超擢僉事監關外軍時關外地爲哈剌慎諸部所據未幾悉受款經畧王在晉令崇煥移駐中前所尋令赴前屯安置遼人之失業者崇煥卽夜行荆棘虎豹中以四鼓入城將士莫不壯其膽在晉深倚重之題爲甯前兵備僉事然在晉無遠畧不能盡其才及在晉議於距關八里築重城崇煥力爭以爲非計十三山難民十餘萬久困不能出大學士孫承宗行邊崇煥請將五千人駐甯遠壯十三山勢別遣驍將救之議阻不行衆遂沒脫歸者僅六千人已而承宗代在晉鎮關益倚崇煥崇煥內拊軍民外飭邊備勞績大著崇煥嘗核虛伍立斬一校承宗怒曰監軍可專殺耶崇煥頓首謝其果於用法類此三年九月承宗乃使崇煥屯軍甯遠更定規制築甯遠城明年工成屹然爲關外重鎮遠近望爲樂土旋遭父憂三疏乞歸守制不許(蘇爻山鐔津攷古錄抄存疏稿情辭哀切)奪情視事四年九月東巡廣甯歷十三山抵右屯遂由水道泛三岔河而還尋以五防叙勞進兵備副使再進右參政當崇煥之東巡也請卽復錦右諸城承宗以爲時未可乃止五年夏復

說承宗遣將分戍錦州松山杏山右屯大小陵河諸要隘曠地二百里幾復遼西舊疆甯遠且爲內地自承宗崇煥之戮力敵人凡不敢窺邊者四年久之逆關魏忠賢忌承宗使其黨排去之十月承宗罷以高第代謂關外必不能守令盡撤錦右諸城守具崇煥力爭曰諸城已復安可輕撤錦右動搖則甯前震驚關門亦失保障第意堅且欲并撤甯前二城崇煥曰我甯前道也官此當死此我必不去第無以難乃撤錦州右屯大小陵河及松山杏山諸城守具驅屯兵入關死亡載途哭聲震野民怨而軍益不振崇煥再疏乞終制不許十二月進接察使於是清軍知經畧之無能而崇煥之孤立也六年正月大舉渡遼河二十三日直擣甯遠崇煥集諸將誓死守刺血爲書激以忠義堅壁清野以待明日大軍猛力進攻戴楯穴城垣圯丈許崇煥身先士卒輦石塞缺口身被再創將士有勸崇煥自重者崇煥厲聲曰區區甯遠中國存亡係之失此不守數年後吾族皆左衽矣自裂戰袍裹左臂傷處戰益力將士爭先効命城復合連戰三日三攻三却圍遂解開壁冀追三十里敵軍死萬餘氣大

挫清太祖嘗言我大清舉兵所向無不摧破諸將罔敢議戰守讖戰守自崇煥始初中朝聞警大集廷議戰守皆無善策經畧第擁兵關上不救中外皇皇謂必無甯遠迨捷聞舉朝大喜立擢崇煥右僉都御史第坐失援褫職以王之臣代三月復設遼東巡撫以崇煥任之旋加兵部右侍郎崇煥與之臣不協中朝慮債事命之臣專督關內以關外屬崇煥畫關守崇煥上書曰陛下以關內外分責二臣用遼人守遼土且守且戰且築且屯屯種所入可減海運大要堅壁清野以爲體乘間擊瑕以爲用戰雖不足守則有餘守既有餘戰無不足顧勇猛圖敵敵必仇奮迅立功衆必忌任勞則必召怨蒙罪乃克有功怨不深則勞不著罪不大則功不成謗書盈篋毀言日至從古已然惟聖明與廷臣始終之帝優旨褒答其冬巡歷錦州大小陵河議大興屯築復高第所棄舊土並上書言遼左之壞先是八月清太祖晏駕崇煥遣使吊且覘虛實太宗遣使還報崇煥因復書申和議云(前畧)往事七宗汗家抱爲長恨者不佞甯忍聽之漠漠但追思往事窮究根因我之邊境細人與汗家之部落口舌爭

競致起禍端作孽之人卽道人刑難逃天怒今欲一一辨晰恐難問之九原不佞非但欲我國家忘之且欲汗共忘之也（中畧）今若修好則城池地方作何退出官生男婦作何退還是在汗之仁明慈惠敬天愛人耳天道無私人情忌滿是非曲直原自昭然各有良心偏私不得一念殺機起世上無窮劫連一念生機開後來許多吉祥（後畧）太宗復書詞甚倨然方有事朝鮮懼崇煥懼其後和議遂粗定清兵乃大舉渡鴨綠江南討朝議以崇煥之臣不相能召之臣還罷經畧不設以關內外盡屬崇煥便宜從事崇煥銳意恢復亦乘清軍之出遣將繕錦州中左大凌三城再使使持書議和會朝鮮及毛文龍同告急朝命崇煥發兵援朝鮮兵至朝鮮已爲清所服乃還初崇煥議和未遽奏請及奏聞優旨許之而朝鮮與文龍被兵言官謂因和議所致頗旨戒諭崇煥欲持是修故疆持益力乃上書言錦州中左大凌三城修築必不可已業移商民廣開屯築倘城不完而敵至勢必撤回是棄垂成功也故乘敵有事江東姑以和之說緩之敵知則三城已完戰守又在關門四百里外金湯益固

矣帝優旨報聞然非其意也時太宗復移書相詰謂將軍遣使議和奚又修葺城垣潛圖侵逼五月十一日清兵直抵錦州四面合圍崇煥以甯遠兵不能動選精騎四千令世祿大壽將繞出清軍後決戰別遣水師東出相牽制且請發薊鎮宣大兵東護關門二十八日清兵分趨甯遠崇煥督將士力戰却之清軍遂引去復益兵攻錦州不克亦引還時稱甯錦大捷惟大小凌河二城防守未完爲清軍所毀時魏忠賢方專權中外爭頌功德崇煥不爲附和卿之實深論崇煥不救錦州爲暮氣叙甯錦戰功文武增秩賜蔭者數百忠賢子亦封伯崇煥止增一秩復使其黨劾之崇煥因乞休七月遂予告歸未幾熹宗崩懷宗卽位忠賢伏誅廷臣爭請召崇煥崇禎元年四月命以兵部尚書兼右副都御史督師薊遼兼督登萊天津軍務七月崇煥入都召見平臺慰勞甚至咨以方畧對曰方畧已具疏中臣受陛下特眷願假以便宜計五年全遼可復帝曰復遼朕不吝封侯賞崇煥頓首謝帝退少懃給事中許譽卿即以五年之畧崇煥言聖心焦勞聊以是慰耳譽卿曰上英明安可漫對異日按期責

效奈何崇煥憮然自失頃之帝出即奏言東事本不易竣陛下既委臣臣安敢辭難
但五年中戶部轉軍餉工部給器械吏部用人兵部調兵選將滇中外事事相應方
克有濟帝爲飭四部臣如其言崇煥又曰以臣之力制全遼有餘防衆口不足一出
國門便成萬里忌能妒功夫豈無人卽不能以權力制臣肘亦能以意見亂臣謀帝
起立傾聽諭之曰卿無疑慮朕自有主持乃賜崇煥尙方劍假以便宜賜酒饌而出
崇煥以前此熊廷弼孫承宗皆爲人排構不得竟其志乃再上疏曰恢復之計不外
臣昔年以遼人守遼土以遼土養遼人守爲正著戰爲奇著和爲旁著法在漸不在
驟在實不在虛此臣與邊臣所能爲至用人之人與爲人用之人皆至尊司其鑰何
以任而勿貳信而勿疑蓋馭邊臣與廷臣異軍中可驚可疑者殊多但當論成敗之
大局不必摘一言一行之微瑕事任既重爲怨實多諸有利於封疆者皆不利於此
身者也况圖敵之急敵亦從而間之是以爲邊臣甚難陛下愛臣知臣臣何必過疑
懼但中有所危不敢不告帝優詔荅之是月甯遠兵變縛巡撫畢自肅等於譙樓上

崇煥以八月初抵關馳往鎮撫一方乃靖時關外犬將四五人事多掣肘因更定甯錦爲一鎮以大壽駐錦州何可剛駐甯遠而移薊鎮趙率教於關門關內外止設二大將因極稱三人之才謂臣自期五年專藉此三人當與臣相終始屆期不效臣手戮此三人而身歸死於司敗帝可之二年閏四月叙春秋兩防功加太子太保賜蟒衣銀幣廕錦衣千戶當崇煥之再起督師也閣臣錢龍錫叩以遼事荅云當從東江做起龍錫謂舍實地而問海道何也且毛帥未必得力崇煥曰可用則用之不可用則殺之毛帥者名文龍仁和人以都司援朝鮮逗留不進遼東失自海道遁回乘虛擊殺清鎮江守將遂授總兵累加至右都督掛將軍印設軍鎮皮島皮島亦謂之東江顧文龍所居東江形勢雖足牽制其人本無大畧往輒敗衄而歲糜餉無算崇煥心弗喜也會文龍來謁接以賓禮又不讓誅文龍謀益決至是遂以閱兵爲名泛海抵雙島文龍來會崇煥與相燕飲因議更營制設監司文龍拂然乃以六月五日邀文龍觀將士射崇煥曰予詰朝行公當海外重寄受予一拜交拜畢登山崇煥問從

官姓名多毛姓文龍曰此皆子孫崇煥笑因曰爾等積勞海外月米止一斛言之痛心亦受予一拜爲國家盡力衆皆頓首謝崇煥因詰文龍違令數事文龍抗辯崇煥厲色叱之命去冠帶繫縛文龍猶倔強崇煥曰爾有十二斬罪知之乎祖制大將在外必命文臣監爾專制一方軍馬錢糧不受核一當斬人臣之罪莫大欺君爾奏報盡欺罔殺降人難民冒功二當斬人臣無將將則必誅爾奏有牧馬登萊取南京如反掌語大逆不道三當斬每歲餉銀數十萬不以給兵月止散米三斗有半侵盜軍糧四當斬擅開馬市於皮島私通外番五當斬部將數千人悉冒己姓副將以下濫給札付千走卒輿夫盡金緋六當斬自甯遠還剽掠商船自爲盜賊七當斬強收民間女子不知紀極部下效尤人不安室八當斬驅難民遠竊人參不從則餓死島上白骨如莽九當斬鞏金京師拜魏忠賢爲父塑冕旒像于島中十當斬鐵山之敗喪軍無算掩敗爲功十一當斬開鎮八年不能復寸土觀望養敵十二當斬數畢文龍喪魂魄不能言但叩頭乞免崇煥召諭其部將曰文龍罪當斬否皆惶怖唯唯乃頓

首請旨曰臣今誅文龍以肅軍諸將中有若文龍者悉誅臣不能立功皇上亦以誅文龍者誅臣遂取向方劍斬之帳前當是時文龍麾下健校悍卒數萬憚崇煥威無一敢動者於是命棺斂文龍明日具牲醴拜奠曰昨斬爾朝廷大法今祭爾僚友私情爲下淚乃分其卒二萬八千爲四協犒軍士檄撫諸島盡除文龍虐政還鎮以其狀上聞帝驟聞意殊駭念既死且方倚崇煥乃優旨褒荅然島弁失主帥心漸攜其後致有叛去者文龍死甫數月崇煥之冤獄已成先是半年前崇煥在遼通籌全局疏言臣身在遼遼無足慮惟薊門軍弱請飭薊督劉策嚴防疏凡三上廷議迂延不行是年十月清兵十餘萬大舉入犯憚崇煥威乃改道入龍井關大安口如行無人境崇煥二十八日聞警卽檄調大壽可剛入衛於十一月初十日馳至薊州與敵兵相遇於馬昇橋諸要隘清軍不意袁軍驟至乃宵遯疾趨而西直犯京師意欲避堅擊瑕使崇煥不能首尾相應崇煥復舍薊由間道馳歸衝霜犯雪兩晝夜疾行三百餘里先清軍至三日軍廣渠門以待清軍至咸大失色詫以爲袁將軍從天上飛來

二十日大戰自辰至申却敵十餘里北追至運河太宗及諸貝勒相語謂十五年來未嘗遇此勦敵遂不復逼京師惟出沒於海子采園之間以觀變崇煥兼程入援僅以馬兵五千當十餘萬大敵且清兵所入隘口乃薊督劉策所轄自謂有功無罪以勢力大相懸絕持重不肯輕戰請入休城中以俟全軍至不許而都人驟遭兵禍怨謗紛起謂崇煥擁兵縱敵朝士因前通和議誣其將爲城下之盟帝聞惑之時清軍新挫畏崇煥如虎諸貝勒有請攻城者太宗托以不欲損將卒適前清軍獲明太監二人於是太宗授秘計令監守者故作耳語云今日撤兵乃上計也頃見單騎向敵敵有二人來見上語良久乃去意袁巡撫有密約此事可立就矣時太監佯臥竊聽之乃陰縱使歸具以上聞帝益信不疑初一日崇煥再被召對遽縛下獄閩臣奏言臨敵易將兵家所忌上曰勢已至此不得不然時大壽在旁出卽悍然率衆東行明日命總兵桂滿爲武經畧環衎嚴陣永定門清軍突衝入營桂滿戰死城中皇皇不可終日帝取崇煥獄中書馳騎追召大壽壽下馬捧泣一軍皆哭即日與何可剛踴

躍入關清軍見遼兵既叛而旋反正乃遽爲議和書移軍畧薊而還方崇煥之殺文龍也輔臣溫體仁乃文龍鄉人每思有以報之至是實陰持其事又崇煥與大學士錢龍錫善龍錫固主定忠賢逆案者其黨高捷袁宏勳史蕙輩謀與大獄爲逆黨報仇捷首疏力攻蕙宏勳繼之必欲并誅龍錫以擅主和議專戮大帥二事爲兩人罪廷臣疏救皆不報總兵祖大壽以官階請贖給事中錢家修請以身代亦不報御史羅萬壽申辯崇煥非叛逆削職下獄布衣程本直詣闕呼冤至同論死崇煥在獄中半年餘關外將吏士民日詣督輔孫承宗所號哭雪冤願以身代者未嘗絕承宗知內旨已定不敢上聞法司坐崇煥謀叛龍錫亦論死遂磔崇煥於市時崇禎三年八月十六日也兄弟妻子流三千里籍其家崇煥無子家亦無餘貲妻黃氏投江死(屍流至縣屬赤水峽鄉人哀而葬之鰾津攷古錄爲立烈婦傳)弟煜流關中作問天賦天下冤之崇煥死後明年復起用承宗鎮關率由崇煥政策以大壽統各路援兵連復灤州遷平遼化永平四城復理關外舊疆旋劾罷之十四年清軍大舉圍錦

州大壽死守經年會松山副將夏承德應敵入城薊遼總督洪承疇生降錦州旋陷
何可剛被執不屈死十七年闖賊陷京師莊烈帝殉國總兵吳三桂迎
大清兵入明亡

卷之三 雜錄

(千零六四)

袁督師事畧書後

後學何壽謙

子序次鄉先正袁督師事實讀明史本傳至崇煥死邊事益無人而明亡徵決矣不禁廢書而歎曰督師以一身生死係中國存亡二百年來思之有餘痛也憶幼時家居從先大夫遊里閭間與羣兒戲石墩上先大夫指子曰汝亦知此物何來乎此前明袁督師之故居遺蹟也督師爲明忠臣被冤死家蕩然鄉人哀思至今故存此以爲紀念（此乃當時石柱墩也今存其四大踰合抱）因授督師遺詩誦之今猶記其南還別友詩有慷慨同仇日間關百戰時功高明主眷心苦後人知之句又與諸將遊海島云榮華我已知莊夢忠憤人將謂杞憂每一高吟烈膽忠肝千秋如見謙不幸少孤得聞督師軼事祇此此外則白馬南北兩岸相去里許有袁氏祖墳其北墳乃督師父子鵬公葬地也其南墳鄉人呼爲犁頭山（因墳前築砂石三墩形如犁頭故沿以爲名相傳督師母老望子久不歸誤信陰陽家言築此魔之督師竟因此不祥罹禍云）父老相傳難徵實錄迨長讀書畧知督師崖湫然觀諸書載

其籍貫則又以互異爲疑明史本傳載爲東莞人廣西通志選舉表則載爲平南人查乾隆間 詔求督師後又得之平南（據平南縣志載乾隆四十九年 上

諭前明經畧熊廷弼袁崇煥皆有輯甯邊境之才得一足以安天下而前後俱被宵小構讒死於非辜朕甚憫焉著廣西巡撫查出袁崇煥後裔量材錄用以獎忠良欽此具覆牒稱袁崇煥無子查其族有繼嗣元孫袁炳現居平南送部引見授峽江縣丞云）攷之廣東省城建有袁襄愍祠（乾隆年間所建某督題其坊有蕭遼柱石四字）東莞縣水明鄉亦爲建立專祠查嘉慶元年廣東巡撫陳大文奏請袁崇煥從祀鄉賢祠奉 旨依議（原奏抄存鐔津攷古錄）觀此則督師之爲東莞人顯而可徵平南志載爲平南人亦不爲無據至督師里居籍貫之在藤者反覺文獻難徵惟攷明南畧北畧載爲藤縣人本府縣志固載爲藤人然皆以明史旣爲督師立傳故祇詳其居里而遺闕佚事缺焉（如本邑鄉賢祠崇祀袁崇煥讀邑志先賢表云據舊志先後載列不詳何年奏請或當時未遽奏聞尙俟查攷）後人之崇拜

督師者各引爲志乘光每以籍貫異同致辯予則謂督師固以國爲家者不觀程本直瀛聲問答記督師之言乎予何人哉十年來父母不得以爲子妻孥不得以爲夫手足不得以爲兄弟交遊不得以爲朋友予何人哉直謂之大明國裏一亡命之徒可也嗚呼督師之鞠躬盡瘁死而後已誠一代之英雄豪傑豈一鄉一邑之可得而私哉丁未春予會考京師與士夫縱觀諸名勝因而遊太學謁 聖廟讀石刻五經摩周宣石鼓而歷朝進士題名碑在焉瞻望間獲觀督師姓名下鐫曰廣西藤縣人乃明萬歷四十七年三甲第三十名進士也（榜首爲莊際昌明末時殉節者）久仰高山覩此爲之狂喜爰榻數紙歸榜於鄉釋前疑惑（攷平南志云題名碑載東莞籍平南人乃僊聞之誤）按督師者本祖籍東莞其父始遷於藤而通志之載爲平南人殆因藤縣之新白馬與平南之舊白馬毗連其名同故紀載易混且袁氏復有顯於平南者（如平邑袁醴庭先生詠督師七律十六首一時稱爲詩史）諸書所載非無因也予嘗欲承 先志於吾鄉爲督師建祠深慙未果會邑侯陳公仲賓

捐廉排印縣志（攷縣志創修於嘉慶 年倡之者 先大父榮祿公也同治 年 先伯父觀察公爲諸生時曾與邑先生重修之今歲久未修版遭於火書存勸 學所者僅一部爲予昔年辦學搜藏者值學部編書局札徵各府州縣志編輯鄉土 地理歷史教科書總董蒙同年經斬弗應命因謀於陳侯而排印之以應學部之求 並以廣流傳俟後來之修輯）因亟傳次督師事實以補之而確證其籍焉非敢私 督師於吾藤也亦非敢謂督師偉績已光昭史冊尙待後學之表彰也蓋區區有不 能已者顧念吾國今日之顛危壓迫於東西強鄰亡國滅種之憂急於前明十倍哀 哀浩劫莽莽神州而欲求一完全軍人之資格如督師其人者寂無聞焉吾爲此懼 督師之雄才大畧勁節孤忠其關係於國家之存亡民族之盛衰爲數千年歷史上 一絕大問題恐流傳久鄉父老或失其真無以爲吾國少年告也不揣固陋贊揚先 正喚醒同魂誰其聞督師之風而起者乎吾其馨香祝之

藤縣志完



